

**NATIONAL ASSEMBLY OF  
SEYCHELLES**

*Tuesday 19<sup>th</sup> April, 2023*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour Manm Onorab. Nou zofisyé ki dan Lasanble bonzour e nou piblik ki pe swiv nou travay ozordi, bonzour e byenveni. E en bonzour spesyal pou en group viziter ki dan nou Lasanble ozordi. Zot a remarke nou annan en group zenn etidyan *SITE – (Seychelles Institute of Teacher Education)* e i en gran plezir pou mwan swet zot labyenveni dan Lasanble.

E mon a fer bann Manm remarke poudir la i la lazenes ki nou koz lo la souvan, e mon vremen apresye ki zot in montre sa lentere dan Lasanble. E an plis ki sa, zot bann ansennyman dan le fitir.

Alor ozordi mon ava envit Lasanble pou ki nou en legzanp eksepsyonnél pou bann zenn ki swiv nou. Akoz nou oule gard zot respe e nou le ki zot annan sa respe pou Lasanble. Byenveni bann etidyan.

En lot pti remark Onorab William in fer mwan, in port a mon latansyon ki dan raportaz *SBC* zot in fer referans avek son, en lot Mosyon ki annan lo *Order Paper* e pa sa enn ki nou pe diskite yer.

Donk mon met sa koman koreksyon pou Lasanble e osi pou latansyon piblik. E mon a kapab fer le neserer pou zis notifie *SBC* ki sa in arive e zot a regarde ki koreksyon zot bezwen fer.

Bon mon pou osi pran lokazyon pou pas lo 2 pwen lo deba Lasanble yer. I annan plizyer lenstans ki mon'n santi poudir deba i pa'n alaoter e bann Manm in al dan size e abord serten size dan en fason ki petet mon pa'n realiz a tan yer, ki mon realize i pa ti'n devret koumsa.

Enn sa bann lenstans se enn ki ti ganny leve koman en *point of order* yer, e sa se sa referans sa servi sa mo "zot" pou fer alegasyon oubyen *statement* an zeneral. E mon ti remarke yer poudir tou lede kote i servi sa, en pe mal apropo tanzantan.

Dan lefe ki ler ou dir zot, i kapab ganny aplike pou Manm ki la dan sa lasal. Alor i annan premye mon remarke Onorab Wavel Woodcock pa la, me premye i annan sa pwen ki li in

fer ki dir “zot annan disan lo zot lanmen” keksoz koumsa. Ki menm si mwan mon’n konpran li poudir i pe aplik zeneralman pou le pase, i kapab ganny enterprete koman - e si bann Manm i la zot osi mon krwar i rezonnab ki zot santi sa pe aplik pou zot.

Alor mon pou demann li pou koriz sa, e mon pa konpran akoz i absan bomaten. Me mon pou demann li pou koriz sa.

Mon lot pwen i apepre dan menm laliny, Onorab Loze osi in fer en *statement* ki i ti dir “Mr Speaker ou’n deza dir mwan ki mon pa kapab dir ki Prezidan Ramkalawan in touy dimoun avek *COVID*.”

E sa osi mannyer in met li mon konpran Onorab Loze pe dir mwan en keksoz ki mon’n deza dir li, me pa repet sa lakizasyon. Par repet sa *statement* i pe relev, i pe refer sa lakizasyon. Alor akoz mon krwar sa i en *matter* vreman serye, mon pou demann Onorab Loze pou fer kler ki i pa ti pe fer okenn lakizasyon kont Prezidan.

Onorab Loze mon pou demann ou fer sa koreksyon.

### **HON JOHAN LOZE**

Koreksyon in ganny fer Mr Speaker.

### **MR SPEAKER**

Mersi Onorab pou ou korperasyon. Nou rebran deba lo Mosyon. Mon annan 3 Manm ki’n lev lanmen deza Onorab Esparon, Aglae e Larue. Mon pou demande, mon anvi terminen avek sa Mosyon dan sa peryod la ki nou ladan.

Donk mon pou demann lezot Manm ki le entervenir pou lev lanmen la, pou mwan ferm mon lalis e apre nou a kapab ziz letan. Onorab Loze, Onorab Naidu e Onorab Monthy. Tre byen. Mersi. *Ok*.

Alor mon annan 6 Manm, i a permet mwan donn mwan donn 15 minit sak Manm. Fotespere nou ava annan ase letan pou fer *summing up* e pou vote dan sa menm peryod. Mersi. Mon komans avek Onorab Regina Esparon.

### **HON REGINA ESPARON**

Mersi Mr Speaker. Bonzour tou dimoun a lekout, bonzour bann etidyan *SITE* dan *Gallery* e byenveni.

Mr Speaker, sa Mosyon anmennen par Onorab William i lir koumsa. “Pe demann Lasanble pou felisit tou travayer dan Sekter Piblik e Prive pou zot solidarite, travay dir e perseverans a kote Gouvernman, pou sa sikse ki

pei in fer dan sa kourt dele letan depi dernyen eleksyon”.

Mr Speaker, en tel Mosyon i montre ki nou osi koman en Lasanble nou konsyan e rekonnèt ki nou lafors travayer in zwe en gran rol pou kontribye ver sa sikse ki Gouvernman in fer dan sa pti gin letan e pou sa nou devret felisit tou travayer Seselwa san eksepsyon.

Tou sa travayer dan Sesel san eksepsyon. E i kler Mr Speaker ki nou tou lo sa kote latab nou pou donn nou sipor sa Mosyon. E mon pou osi ankouraz bann Manm lo lot kote latab pou fer parey an sir solidarite ek tou travayer, malgre serten diferans dan lafason ki nou panse lo sa size.

Annou gete kote nou’n sorti depi ki Gouvernman LDS in vin o pouvwar. Mr Speaker, ozordi tou dimoun dan Sesel in ganny en lavwa. Ozordi dimoun in nepli per pou koze parey oparavan. E sa travayer i lib pou li koze eksprim li libreman san ki i bezwen ganny viktimize.

Gouvernman in redwir lakantite *GOP* ki ti pe donner, e in met plis lanfaz lo met Seselwa dan en lanplwa. E ozordi plis *vacancy* pe ganny afise tou le semenn lo televizyon, dan Nasyon e kot Biro Lanplwa.

Lo kote *tourism* pei pe fer pli byen malgre ki *COVID* i ankor pe ravaz lemond. E la Mr Speaker nou pou remarke ki depi apre sa pandemik ki ti met en *lock down* en pe partou dan lemond, kot Sesel pa ti ganny eparye, e ki depi ki Gouvernman LDS in pran en desizyon brav, ler i ti reouver nou erport, nou’n vwar ki bann marse touris in kontinyen fer byen. E nou’n osi ganny nouvo *airline* ki’n swazir Sesel koman zot destinasyon, parey avyon sorti Larisi, *Turkish* e lezot.

E pou sa nou felisit Gouvernman ki kontinyen rod sa, rode ki sa meyer pou son pep e Minis *Tourism* ki touzour pe rod plis korporasyon e donn sa konfyans pou nouvo pei swazir Sesel koman en destinasyon.

Mr Speaker, anmezir ki nou felisit tou travayer ki swa dan Sekter Piblik ou Prive, les mwan get en kou nou bann travayer isi kot nou Lasanble. Nou pou komans par felisit zot, sak zonm ek fanm ki pe ede pou fer nou Lasanble marse.

Akoz san zot isi kot nou Lasanble nou travay pa pou arive konplete, aköz sakenn de zot, zot rol i vreman enportan pou fonksyonman nou lenstitisyon. Komansman par sa gard sekirite pou ouver baro

pou nou antre bomaten, ki akey nou avek en sourir ler nou pas dan baro bomaten. Felisitasyon!

Sa zardinyen ki nou zwenn pe aroze ler nou *park* nou loto, ki fer sir ki zerb i reste kourt e zarden i prop. Felisitasyon! Sa *cleaner* ki nou zwenn dan koridor pe fer sir ki landrwa i prop e kot nou travay i dan konfor. Felisitasyon pou sa bon travay! Mersi pou vin granmaten pou fer sir ki ler nou, nou antre landrwa i prop.

Serzan ek son lekip travay ki fer sir ki travay i mars byen e ki sa dernyen pti latous i ganny mete. Mersi. Sa travayer lo resepsyon ki fer sir ki i akey nou, e lezot viziter ki vin kot nou Lasanble e pe toultan gete si ou pa bezwen naryen, mersi e felisitasyon!

Mr Speaker san oubliy sa sekreter dan biro ki fer sir ki ou'n ganny tou lenformasyon oubyen dokiman ki ou bezwen, pou afront ou lazournen travay. Mersi Gerda, mersi Pam! Sa teknisyen ki fer sir ki tou lekipman sonorizasyon i fonksyonnen e ki sesyon i kapab ganny transmet lo radyo ek televizyon, pou ki ou ki dan lakour ou reste azour e ki ou konnen ki pe pase isi anndan.

Pou *clerk* bann diferan Komite Lasanble ki fer sir ki

travay komite i pas byen, mersi pou zot bon korporasyon. San bliy bann travayer dan Sekretarya, ki enkli nou bann zofisyè Finans, Madanm Clerk e Madanm Depite Clerk, enkli ou menm Mr Speaker ki pe diriz nou Lasanble pou fer sir ki sesyon i deroul dan lord ek lape e nou Lasanble i avans dan en fason demokratik, parey nou moto in ganny ilistre dan larantre nou Lasanble – “*Serving a modern democracy*”.

Pou zot tou bann travayer Lasanble mon dir zot mersi. Felisitasyon pou sa bon travay ki zot pe fer pou nou!

**(APPLAUSE)**

### **HON REGINA ESPARON**

Mr Speaker lo en lot not mon ti a voudre felisit Gouvernman ki ti anbank lo en programm vaksinasyon, kot i ti met a dispozisyon son pep vaksen pou naryen pou protez nou. E bann lezot fasilite ki ti ganny servi pou konbat sa pandemik.

Mon napa dout ki *LDS* i en Gouvernman ki annan son pep aker, e ki i ti fer sir ki i ti pe donn son pep tou sa proteksyon kont sa viris pou zot kontinyen reste an bonn sante, e fer sa kontribisyon pozitiv anver nou lekonomi.

Nou osi konnen ki ler nou koz lo *COVID* Mr Speaker, i annan bokou fanmir ki annan en leker lour, parski zot in perdi enn zot pros ki ti osi en travayer ki ti pe kontribye anver Bidze lafanmir. E ki'n osi kontribye ver sa sikse ki nou pe rekonnèt ozordi. Nou konpran ki zot in pas ladan e nou senpatiz avek zot ki'n perdi enn zot pros ek *COVID*.

E la mon oule reasir zot ki se pa Prezidan Ramkalawan ki'n anmenn *COVID* Sesel, e pa li ki'n touy personn ek *COVID*. Sa viris i en maler ki'n frap lemonn antye, kot Sesel osi pa'n ganny eparnye. Prezidan in fer son mye pou ganny vaksen pou naryen pou protez nou popilasyon.

E tou dimoun ti lib kantmenm i annan ki ti *boycott* pou pran sa vaksen, i annan ki'n pran dan kasyet annou pa fer kalonmni kot pa fodre Mr Speaker e annou aret fann fo propagann, akoz i pa anmenn nou okenn par.

Mr Speaker i bon fer remarke ki sa travay dir e zefor ekstra ki sak Seselwa in donnen, i fer ki en Dolar in sorti R22 apre 2020 ler *LDS* ti pran ladministrasyon e in ariv anviron R15 a R14 e in tenir lo sa nivo ziska ozordi.

Zis demann ou lekor kote nou ti pou ete si ozordi an sa ki konsern pri komodite e servis si dolar ti'n reste R22 e pei pa ti'n ouver pou relans nou lekonomi? Zis mazin sa. Vreman bokou in ganny akonpli dan sa pti gin letan parey Mosyon pe fer sorti. Nou kontan ki bokou ki ti pe depan lo *welfare*, dan sa lespri transformasyon, zot in santi sa bezwen pou zot osi fer en kontribisyon pou sa pei. E zot in leve e in al rod en lanplwa. Felisitasyon pou ou ki'n pran sa bon linisyativ.

Pou ou sa enn ki kit ou lakour granmaten e retourn tar aswar e ou pe fer 2 louvraz, felisitasyon pou ou kontribisyon. Pou ou sa ners ki donn tou e ankor pe donn tou sa zefor dan ou travay, malgre parfwa lanvironnman e demann piblik i difisil e sityasyon pa fasil. Mersi pou ou kontribisyon.

Pou ou sa *teacher* ki pe donn tou pou fer sir ki ou zanfan i ganny edike, mersi! Pou ou sa zofisye lapolis ki pe donn tou pou fer sir ki i annan lord ek lape dan ou kominote e lo larout piblik, felisitasyon e mersi bokou.

Pou ou sa fermye, sa peser ki pe fer sir ki ou pe ede ek alimantasyon sa pep, mersi! Ou

ki pa dan en lanplwa formel me ou *self-employed* e ou pe rann en servis dan lakominote. La mon mazin sa koudriyez ki pe rann sa servis atraver fabrik nou lenz; sa mekanisyen ki asiste nou ler nou loto i kase, sa plonber ki vin aranz nou tiyo ler i kase, sa travayer *LWMA* ki netway semen pou ki i reste prop e sa ki pe pase gran bomaten pou retir bin, pou ki nou distrik i reste annord.

Sa drayver *SPTC* ki deplas ou pou ariv travay a ler e tou lezot ki pe rann sa servis dan lakominote, mon dir zot mersi pou zot kontribisyon. E la mon mazin osi sa *DA*, sa *clerk*, sa *office manager*, sa *social worker* e lezot travayer ladministrasyon distrik ki pe rann sa servis dan lakominote. Mersi e felisitasyon.

Zot tou zot in zwe en rol pou ede fer sa pei avanse e kontribye ver sa sikse e nou dir zot mersi. Pou ou ki pa ankor sitye ou dan sa transformasyon, swa ou ankor napa en travay, al anrezistre kot Biro Lanplwa e komans en demars pou en travay.

Pou ou ki ankor pe esper en lakaz fer sir ou reste azour ek ou peyman *Home Saving Scheme* pou ou kalifye. Ou sa zenn ki fek *graduate* reste konekte, reste a azour lo diferan

*vacancy* e loportinite travay atraver Biro Lanplwa.

Mr Speaker, mon konnen ki revizyon dan kad saler in selman arive atraver zefor e travay dir, ki sak Seselwa in met dan son travay. Ki swa dan Sekter Piblik ou dan Sekter Prive pou ki lekonomi nou pei i amelyore, pou sa mon dir zot mersi bokou. Mon osi salye zefor bann madanm ki pe kontinyen fer byen dan zot travay e ki pe fer li avek tou leker, mersi e kontinyen met sa zefor.

Mr Speaker mon'n deza en *civil servant* dan mon bann pli zenn letan mon lavi. Napa keksoz pli gou ler ou'n konplet en zournen travay kot ou'n donn tou, ler ou kit ou travay e ou ariv kot lakour ou santi sa satisfaksyon atraver sa kontribisyon ki ou'n fer. Sirtou ler ou santi ki ou'n fer en diferans dan lavi en dimoun.

Pou bann travayer, pou bann dimoun ki travay *odd hours* ou travay lo *shift* letan nou, nou pe dormi. La mon mazin sa travayer kot Lopital North East Point, *Hospice* e *Regional Homes*. Mersi pou zot devouman e dedikasyon anver nou bann dimoun aze.

Sa solda ki pe travay lo lanmer pou anpese ki sa pwazon ki apel *heroin* i antre

dan pei. Kontinyen sa lalit kont sa drog danzere pou ede protez sa bann travayer Seselwa kont sa pwazon. Ou ki lo sa lapoud, oubyen ou ki ou sel metye se pou fer trafik drog e anpwazonn nou zenn, kalkil 2 fwa ki ou aksyon pe afekte nou zenn e pe anpes zot travay.

Vann drog pa en metye, leve e al rod en travay formel ki kapab anmenn en kontribisyon pozitiv pou nou sosyete. An menm tan ki nou pe felisit bann travayer Seselwa pou sa bon travay ki zot in fer, pou ed sa Gouvernman ariv kot i ete ozordi, mon ti a kontan dir bann ki pa pe perform alaoter pou pran en pti letan e reflexir ki dan en lasenn tou mayon i enportan pou fer li for.

E pou travay avanse i enportan ki sakenn i zwe son rol pou fer keksoz marse. E sa i fer mwan mazin lektir *Corinthien*, sapit 1 verse 12 ki dir ki en lekor i annan plizyer parti, e sak parti i annan son fonksyon depandan son kapasite.

Latet pa kapab fonksyonn pou lebra, zorey pa kapab fonksyonn pou lipye e pou form en lekor sak manm i enportan. Ou ki dan Sekter Prive ou kontribisyon ki ou pe fer i osi enportan, akoz ou osi ou form par dan sa mayon.

E Mr Speaker dan en lekip travay osi i parey, sakenn i annan son responsabilite pou fer travay marse. Pou ou ki fer sir ki sa mayon i zwenn e ou pe donn tou zefor, felisitasyon.

Pou terminen les mwan pas en mesaz pou ou sa enn ki ankor pe vir an ron, ki pe kale e pa pe donn sa rannman. Mon garanti ki ou kapab sanz ou mantalite e realize ki ou aksyon i pe ede met retar en sosyete. I pa tro tar pou ou kapab sanze pou fer sa kontribisyon pozitiv dan ou travay.

Mr Speaker, mon pou donn on sipor sa Mosyon anmennen par Onorab William, ki pe demande ki Lasanble pou felisit tou travayer dan Sekter Piblik e Prive pou zot solidarite, travay dir e perseverans a kote Gouvernman, pou sa sikse ki pei in fer dan sa kourt dele letan, depi dernyen eleksyon. Avek sa 2 mo Mr Speaker, mon swet tou travayer dan Sesel en bon lafet e mon remerseye ou. Mersi.

**(APPLAUSE)**

**MR SPEAKER**

Mersi Onorab e mersi pou retourn nou lo Mosyon. Onorab Woodcock mon'n fer en deklarasyon avan deba in rebran, e mon pa pou repet mon

lekor. Selman mon pou demann ou pou koriz en *statement* ki ou ti fer yer lo size ki i dir “zot annan disan lo zot lanmen” en keksoz koumsa. Mon oule ou korize poudir ki i pa enplik okenn Manm sa Lasanble. Zis koriz sa silvouple.

**HON WAVEL WOODCOCK**

Mr Speaker, ler mon ti pe fer referans avek - yer ler mon ti mansyonn “zot”. mon bezwen dir Mr Speaker mon annan en pe rezervasyon pou mwan *retract* sa *statement*, akoz yer swar mon’n annan en gran konversasyon avek en fanmir Hassan Ally.

Mr Speaker lot kote latab sa bann Manm...

**MR SPEAKER**

Onorab nou pa pou rebran deba, mon pe zis demann ou koriz sa *statement* ki i pa aplik pou Manm ki dan lasal Lasanble. Silvouple, silvouple korize.

**HON WAVEL WOODCOCK**

Mr Speaker ler mon mansyonn zot, kantmenm laverite i ofans son met mon ti pe fer referans avek Parti *SPUP*, *SPPF*, Parti Lepep e *A New United Seychelles* sel parti ki’n touy plizyer nou frer ek ser dan lepase. Mersi.

**MR SPEAKER**

Mersi. *Sorry*, Onorab ou pa’n fer sa ki mon’n demann ou fer. Mon’n demann ou dir pou dir i pa aplik pou Manm ki dan sa Lasanble, silvouple.

**HON WAVEL WOODCOCK**

Menm si i annan Manm ki dan lepase zot in *endorse*.

**MR SPEAKER**

Non, non, non Onorab krwar mwan mon serye. Si ou pa kapab fer sa mon pou demann ou pou sorti dan lasal. Ou pou dir mwan, ou pou koriz sa *statement* pou dir i pa aplik pou Manm ki dan sa Lasanble.

**HON WAVEL WOODCOCK**

Mr Speaker, si mon fer sa mon pou *let down* en kantite fanmir Sesel. Plito mon a *walk out* Mr Speaker.

**MR SPEAKER**

Non, i pa aplik pou Manm ki dan sa Lasanble. Onorab mon napa, mon’n ase.

**HON WAVEL WOODCOCK**

Mr Speaker, mon *retract*.

**MR SPEAKER**

Mersi. Byen. Nou a kontinyen avek deba, Onorab Aglae.



**HON EGBERT AGLAE**

Mersi Mr Speaker. Bonzour tou Manm Onorab, nou bann *teachers* ki dan Galeri e tou Seselwa ki pe ekout nou ozordi.

Mr Speaker Mosyon ki la devan nou, pe demann Lasanble pou felisit tou travayer Sekter Piblik e Sekter Prive pou zot solidarite e travay dir e perseverans akote Gouvernman pandan sa kourt dele letan depi sa dernyen eleksyon.

Mr Speaker, nou lo sa kote latab, premyerman mon a dir ki nou lanmen i prop.

**(APPLAUSE)**

**HON EGBERT AGLAE**

E Mr Speaker sa Mosyon ti kapab fer plis zistis si loter Mosyon ti vin ek en Mosyon, sa Mosyon dan en fason pli senser. Mon dir pli senser Mr Speaker akoz letan ou get *wording* sa Mosyon, sirtou lafen sa Mosyon. 'Kourt dele letan depi dernyen eleksyon'.

E nou tou nou konnen pou dir sa pei Seselwa pe travay pandan plis ki 43an, i pa sa dernyen eleksyon. E pou mwan nou'n mank en loportinite pou sey inifye sa pep travayer ki la deor, pou zot reste pli rezilyan, kontinyen batir sa pep. E

lafason ki Mosyon in ganny *word* i kre divizyon.

Akoz mon dir i kre divizyon ant travayer? E dernyen eleksyon i annan 28 mil dimoun ki ti vot pou US, e larestan ti donn sipor LDS. I veditan ou pe koz lo sa Mosyon, mannyer ou'n *word* li i annan eksklizyon ladan. E i annan pa pou santi li apartenir. E mwan mon ti a swete ki loter Mosyon i ti a, pa ti a enkli sa bout dernyen eleksyon. Akoz pandan sa 2an edmi ki zot in o pouvwar zot ti'n ganny en Sesel ki ti'n fini batir zot.

Zot in ganny en Sesel ki ti annan en lafors travayer ki enkli Seselwa ek etranze ti pe travay. Zot in ganny en Sesel ki en kantite devlopman in ganny fer e kot pei li menm li ti deza pe ganny rekonnet lo nivo enternasyonal pou bann bon fason pratik ki ti ganny fer.

**(APPLAUSE)**

**HON EGBERT AGLAE**

E letan mon tann Manm koze poudir ki ozordi zot annan plis lavwa, zot kapab eksprim zot lekor libreman, me mwan mon rapel dan letan ki Prezidan Faure ti o pouvwar, zot ti ganny plis liberte pou fer sa ki zot le.

E napa personn ki ti ganny met dan kaso.

**(APPLAUSE)**

**HON EGBERT AGLAE**

Kan zot anba lekspresyon “laliberte lekspresyon” Mr Speaker, i annan 1 nou ser ek nou frer ki ti ganny met dan kaso aköz zot ti pe eksprim zot laliberte lekspresyon sa i Veronique ek Antoine Hoareau.

**(APPLAUSE)**

**HON EGBERT AGLAE**

So, pou mwan Mr Speaker mon vwar i annan serten lipokrizi, mon konnen poudir nou pe al fini Lasanble. E zot anvi *end* li lo en *high note*, me mon pa ti pe ekspekte li dan sa kalite fason, kot zot pe servi ledò travayer pou zot glorifye zot Gouvernman.

Mon pou dir sa aköz Mr Speaker, mon pou sit enn 2 legzanp, depi ki zot in pran labar Mr Speaker wi, nou ti dan en moman *COVID* e Gouvernman avan i ti sey tou son mye pou adres bann defi ki atase avek *COVID* kot i konsern travayer. E enn sa bann mezir sete ki okenn travayer pa perdi son travay, pa perdi son lanplwa. E se la kot Gouvernman ti anmenn bann *incentives* atraver *FA4JR* pou

kapab soutenir nou travayer Seselwa, ek prive.

Ozordi pou sa akt responsab ki nou ti fer, ki Gouvernman ti fer, nou pe ganny blanmen dan en fason kot nou mal zer larzan lepep. Me pou nou sa ki enportan, se si sa pa ti ganny fer, en kantite travay, travayer ti pou perdi en lanplwa, en kantite biznes ti pou fermen.

Nou bezwen mazin sa bann letan osi kot travayer in solider, kot travayer in annan solidarite ant son koleg travayer. Sa i bann moman mon kapab dir ti pli dir. Parey an 2008 letan nou ti antre dan reform. Travayer ti solider, travayer ti reste a kote pou siport son pei.

Sa ki pli enportan, pa pou siport Gouvernman, me pou siport pei Sesel.

**(APPLAUSE)**

**HON EGBERT AGLAE**

E se sa ki mon dir Mosyon pa pe fer zistis, aköz i annan en konotasyon politik pou glorifye sa Gouvernman la ozordi. E si tou travayer ozordi i deside leve pou li al travay, se aköz i bezwen nouri son lekor, i bezwen sonny son fanmir, i bezwen pey son det.

Se sa bann pli gran rezondet ki travayer i leve pou al travay e osi pou kapab kontinyen devlopman sa pei. Akoz tou programm Gouvernman ki annan an plas pou kapab enplimante, ou bezwen travayer. E nou osi la anndan nou pa zis politisyen nou, nou bann travayer e se sa ki nou bezwen debout akote travayer.

E pou mwan Mr Speaker, LDS dan Lasanble zot in mank en gran loportinite. Parey Onorab Georges i kontan dir - atraver ou Mr Speaker - nou'n mank loportinite pou nou defann drwa travayer. E LDS avek son *super majority* dan Lasanble *in Government*, letan sa 10 solda lot kote latab ti pe debat bann dwa travayer zot ti rod diferan rezon.

Zot pa'n vin devan avek bann mezir konkret pou met devan zot prop Gouvernman, pou dir vwala tenir en kou, mon krwar la nou bezwen get travayer. E ki fer mwan retourn *back* dan nou letan ki nou ti dan ladministrasyon Mr Speaker.

Bann mezir ki Gouvernman ti pran letan ti annan bann parey 2008 reform, pandemik COVID in vini, nou ladministrasyon ti rod tou fason pou sey anpar bann ki pli

vilnerab. Akoz se sa pti group, sa group ki sak fwa i ariv okenn sok, se zot ki ganny tape premye. Akoz zot vilnerabilite, zot abilite finansyel i minim.

Konpare ek sa enn ki pli anler, ki li i annan ase mwayen menm si sok i tap li i pou annan en *buffer* ki pou anpar li ziska ler sa parkour sok i sorti.

E sa pti group li, i pa en pti group li i en group mazorite. Li tou kou i pou ganny tape li e se sa ki ou vwar bann diferan lenstans Gouvernman i vin avek bann *scheme*, bann *safety net*, rod fason pou soulaz fanmir, rod fason ki mannyer pou ed li avek son bann sipor finansyel, sosyal.

E se en Gouvernman responsab ki fer sa. Me lot kote latab Mr Speaker, napa enn ki'n oze vini poudir ek son prop Gouvernman ki zot annan en *super majority* letan ti pe koup sipor sosyal, letan *welfare* zis 115 dimoun pou en pei ki annan plis ki 40mil travayer ki pe travay. Zis 115 dimoun ki vedir ler i diviz li par 26 distrik apepre 4,5 dimoun ki pe ganny sipor. E ou le dir mwan, zis 4, 5 dimoun par distrik ki ti bezwen lasistans?

E nou koman bann Manm Lasanble Mr Speaker, nou ganny *call*, nou ganny *text* dimoun i vin vwar nou.

Problenm manze, problenm pou pey bil, problenm pou pey bis. Eski *Welfare* li i pa ti vwar tousala li? Zot ti pe mazin zis anmas reveni, fer lekonomi apre zot vin dir nou fer *savings*? Eski sa i en Gouvernman responsab? Mwan pou mon non Mr Speaker, sa i en Gouvernman ki pe mazin zis son lekor e sa bann ki pli o.

Mon dir sa Mr Speaker, mon santi poudir lot kote latab in abandonn travayer dan letan ki zot ti dan difikilte. Nou, nou'n anmenn plizyer kestyon, *PNQ* menm si nou'n ganny oprese dan en fason. Mon a fer li dan en lot fason Mr Speaker. Menm si letan nou ti pe *voice out* nou konsern, diferan fason in ganny fer pou sey fer nou pa kapab kontinyen koze Mr Speaker dan sa Lasanble. Akoz nou ti pe koz pou travayer.

Zot dir ki zot pran bann desizyon brav, zot in dir dan sa Lasanble. Bann *leaders* dan *LDS* in dir sa Mr Speaker. Me desizyon brav ki zot fer se ler ou afekte sa enn ki pli vilnerab li menm. Me letan i annan bann desizyon brav pou pran pou sa kous ki pli o nivo, ki annan plis mwayen, Zot tat tate ouswa zot *retract*. Parey letan ti annan lentrodiksyon bann *tax*, sa bann *tax* pa ti pe *apply* pou malere sa. I ti pe *apply* pou

bann kous ki pli o e deswit *retract*. Me letan i ariv pou malere, letan nou koz lo pri bis ki pe monte nou dir, be gete i annan fanmir i annan 3, 4 zanfan pou pey bis. Ozordi zanfan lekol si ou mank en bis ou bezwen pey ou R12 sepa R14.

Ou al en *training*, apre ler ou pou monte ou pou bezwen peye sa pri. I en bann kou ki paran. Me nou pa ti kapab asize dir annou revwar sa? Nou kapab vwar plizyer milyon pou met dan serten antite pou fer bann *witch hunt*, nou pa kapab war en pe milyon pou *subsidies* sa kou bis. Pou *subsidies* en pti gin sa bann bel fardo ki lo ledo sa pep. Nou pa kapab vwar sa.

I fer ki napa senserite dan sa ki zot pe fer, e si zot ti annan leker travayer zot ti pou fer keksoz diferaman. E sa mon senserman krwar ladan. Zis parey dikton i dir, zot annan lenz zis pou maryaz e fer festen. Me lenz pou al lanterman zis *US* ki mete sa mon krwar.

Mr Speaker en keksoz osi ki mon pou bezwen touse se, i annan en group travayer dan sa pei ki depi *COVID* zot in donn vremen, vremen e sa mon pou felisit zot sa. Bann group travayer ki travay dan servis esansyel. Sa i tou travayer lopital. Pe enport si ou en

profesyonnel, pe enport si ou en *ordinary worker*. Akoz zot tou zot en mayon ki'n fer fas.

Zot in fatige e i annan ki'n le *give up* e i annan ki'n ale, e mon tir mon sapo ek sa group travayer mon. Osi bann ki'n ede met lord ek lape pandan bann letan kot ti annan *curfew*.

**MR SPEAKER**

15minit onorab.

**HON EGBERT AGLAE**

Wi Mr Speaker. Mon pou konklir. Kot i annan *curfew* menm si i annan ki ti kas *curfew* ti al fer aksidan. Me Mr Speaker, osi bann lezot kad travayer esansyel. Me i malere ki letan nou ti pe koz lo trezyenm mwan saler, mwan si mon ti dan en pozisyon dirizan mon pa ti pou negosye trezyenm mwan saler pou sa kad travayer mwan.

**(APPLAUSE)**

**HON EGBERT AGLAE**

Mon ti pou donn tou sa bann travayer ki ti dan servis esansyel depi *COVID* zot *full* trezyenm mwan saler, akoz zot in travay. E menm zot *long service allowance* zot ti pou gannyen.

**(APPLAUSE)**

**HON EGBERT AGLAE**

Me i malere Mr Speaker en kantite keksoz mon kapab kontinyen koz lo la, me Mosyon pa pe fer zistis ki i devret fer. Si nou pe koz lo travayer zis pou glorifye en peryod letan ki *LDS* in o pouvwar, e pou montre zot febles, akoz i annan en ta defi.

Seselwa pe kriye, travayer pe plennyen. Pou sey *sugar coat* sa ki pe pase *the Motion*, sorry loter Mosyon mon annan en gran respe pou ou, me sa gro nyaz nwar pa ankor sorti lo sa pei Sesel. Mersi Mr Speaker.

**(APPLAUSE)**

**MR SPEAKER**

Mersi Onorab. Mon pe aplik limit letan anba mon lotorite, anba *Standing Order 57(11)*. E sa se pou nou kapab fini sa Mosyon la dan sa peryod, akoz mon pe antisipe ki nou pou pran en lot Mosyon pou larestan lazournen, pou fer sir ki nou annan letan pou li.

Olye les sa deborde ki apre nou pa kapab al okenn pli lwen avek Mosyon. Donk, mon a kontinyen avek Onorab Flory Larue. 15 minit.

**HON FLORY LARUE**

Bonzour Mr Speaker. Mersi tou dimoun ki dan Galeri. Mersi tou

piblik ki pe ekout nou. Bonzour tou Manm.

Mr Speaker, nou'n tann nou Prezidan dir nou ki nou bezwen mannevre nou pei parey en biznes. In dir ki si nou fer sa, nou pou vwar en kantite benefis pou tou dimoun. En biznes Mr Speaker, i pou kapab vin en sikse atraver son kalite *workforce* ki i annan, savedir son travayer.

Se sa bann dimoun ki travay pou fer fonksyonnen sa biznes ansanm avek sa dimoun ki propriyeter sa biznes, pou fer ki i vin en sikse. Letan en biznes i vin en sikse Mr Speaker, koman en tim sa group travayer i vwar zot benefis atraver zot saler e lezot *perks*, ouswa benefis ki sa biznes i met a zot dispozisyon.

Mr Speaker si nou pou aplik sa avek nou pei Sesel, nou vwar atraver sa Mosyon, parey Onorab William in dir nou ki dan sa pti kourt letan nou'n vwar pei pe fer en sikse. Mr Speaker ki savedir sa sikse pou nou ozordi?

Letan nou bezwen plas nou pei ozordi, nou bezwen plas li dan dele letan ki nou, nou ladan ozordi. An 2023 letan nou pou regard an deor Sesel Mr Speaker nou vwar ki en kantite pei pe ganny tape ekonomikman.

Nou vwar ki kou lavi in monte otour lemonn e sa i akoz en sityasyon ki nou fek pas ladan atraver pandemik *COVID-19*. Kot bokou pei in bezwen ferm son frontyer, e en kantite devlopman e prodiksyon in ganny afekte alor reveni sa pei e zot larises i ganny tape.

Mr Speaker nou Gouvernman in pran bann desizyon ki fer ki nou, nou'n rekomans lo sa larout ase vitman. E nou'n vwar ki nou kapab garanti saler pou tou travayer dan sa kourt dele letan apre sa bann difikilte, ki nou'n pas ladan.

Mr Speaker, letan en lasosyete i travay, i fer ki nou promot en kolizyon dan lakominote, nou fer monte partisipasyon sivik letan dimoun i al travay e nou kapab redwir depans ki en Gouvernman i fer atraver bann benefis *welfare* letan plis dimoun i dan lanplwa.

Mr Speaker e la mon bezwen pran en pwen ki'n ganny met devan lo kote konotasyon sa Mosyon. Mr Speaker letan Onorab Waven William in anmenn son Mosyon, in anmenn li avek en bi pozitivite. Kot nou vwar ki Onorab Esparon in pran sa loportinite pou felisit en gran

group dimoun ki bann travayer dan Sesel.

Mr Speaker, letan mon regard sa Mosyon mon pa vwar ki bor ki in ganny politize. Letan nou'n koz travayer dan Sekter Piblik e Prive, nou'n koz lo popilasyon Sesel antye ki travay e la i enkli tou lede group siporter politik *US* e *LDS*.

Me par kont Mr Speaker, se lot kote latab ki'n politiz sa deba e zot in mank en loportinite pou profite pou ankouraz pep Seselwa pou kontinyen travay e ladan i enkli zot siporter. Mr Speaker, letan en parti politik i al fer konpany e i vwar en group dimoun ki pa travay e pa kontribye dan lakominote e zot ankouraz sa dimoun pou kontinyen fer sa, E zot koman en parti politik zot dir zot pou vin o pouvwar, zot pou donn li tou sa ki i bezwen pou soutenir li.

Letan nou pran sa bout dan Mosyon ki dir dan en kourt dele letan, nou'n fer en kantite sikse Mr Speaker, enn bann sikse ki Gouvernman in fer se in ankouraz pep Seselwa pou pran en lanplwa e kontribye dan son kominote e dan son pei.

Mr Speaker pep Seselwa fodre i fer atansyon, aköz zot ekout sa group dimoun ki'n dir asize, pa travay, nou pou sonny

ou, nou pou retourn an aryer Mr Speaker.

Mr Speaker, letan nou pe dir en pep isi Sesel, Gouvernman nou oule felisit group travayer nou bezwen regard nou listwar koman en pei. Koman en pti pei nou annan nou en zenn listwar 250an, Mr Speaker depi ler nou an egzistans e toultan nou'n en pep travayan Mr Speaker.

Letan nou'n travay, nou'n batir nou pep, nou'n prouv nou koman en koloni Mr Speaker. Koman en koloni nou'n kontinyen devlope. Mr Speaker nou ti annan ners, dokter, profesyonnel, avoka, Ziz, Seselwa Mr Speaker avan 1977, avan koudeta.

**(APPLAUSE)**

### **HON FLORY LARUE**

Mr Speaker koman en pep sa letan avan koudeta nou ti'n fini etabli bokou profesyonnel Seselwa dan bokou sekter. Ki ti arive avek sa lafors travayer Mr Speaker letan ti annan en sanzman dan pei, en sanzman radikal? La Mr Speaker ou bezwen gid mwan si mon pou dir "zot" ouswa pa "zot".

Akoz mon bezwen sa gidans Mr Speaker, koudeta an 1977 ti ganny fer par en parti politik. Son *Leader* ti mont lo

radyo i ti dir nou ki i annan en gran group dimoun deryer li pou ed li fer sa koudeta letan Prezidan pei ti aletranze.

Ozordi Mr Speaker lo lot kote labab nou annan nou en parti politik ki i dir nou li i dekoul dan sa menm parti. Eski mon pou dir “zot” ouswa non Mr Speaker? Eski mon pa pou korek si mon servi sa mo “zot” akoz zot ki ti fer koudeta Mr Speaker!

**MR SPEAKER**

Onorab *ok*, mon a donn ou gidans.

**HON FLORY LARUE**

Wi, Mr Speaker.

**MR SPEAKER**

Ou’n fer ladiferans ant en parti politik ki’n o pouwar avek Manm ki dan sa Lasanble. Sa ki mon pe demann ou fer, se pa akiz Manm ki dan sa Lasanble pou keksoz ki zot pa responsab. Se tou, mersi.

**HON FLORY LARUE**

Mersi Mr Speaker, mon pou sey fer sa distenksyon ant en parti politik avek manm en parti politik. I paret mwan en manm en parti i pa pran lidantite son parti aker. Alor zot oule fer sa distenksyon ant zot parti ek zot lekor, alor zot bann dimoun

endepandan zot parti zot Mr Speaker.

Alor sa bann dimoun ki endepandan avek parti *SPUP*, *SPPF*, Parti Lepep ki ozordi zot apel zot lekor *A New United Seychelles* Mr Speaker pa menm parti ditou sa. Selman zot annan en per fondater ki sorti dan parti ki ti fer koudeta.

*Anyway*, Mr Speaker mon a retourn lo Mosyon. Avan ki sa parti politik ti fer koudeta avek zot per fondater ki pa menm parti avek parti *A New united Seychelles*, nou ti annan Ners, Dokter, ek lezot profesyonnel kalifye dan pei Mr Speaker.

E letan zot ti vini Mr Speaker nou’n tann nonmen ki nou ti annan nou program 43an. Mr Speaker, ankor i difisil pou mwan pa dir “zot” akoz zot in idantifye zot lekor depi 43zan avek en menm program pou travayer dan Sesel.

Alor dan zot program 43an ti komans avek koudeta Mr Speaker letan nou ti annan ners, dokter ek lezot profesyonnel kalifye Seselwa, zot ti ferm kolez e zot ti ferm *Regina Mundi* Mr Speaker, akoz sa pa ti en bon keksoz pou zot. Pou sa ansyen parti ki zot pa afilye avek. Sa parti li ti ferm kolez e *Regina Mundi* anba per fondater Mr Speaker.



Apré dan zot program 43an, me selman nou bezwen met li par morso akoz nou annan *SPUP*, *SPPF*, Parti Lepep ek *A New United Seychelles* - pa konnen ki mannyer nou pou kas sa an morso - dan zot program 43an Mr Speaker, nou'n vwar ki si ou ti anmenn politik dan travay - (Mr Speaker, Onorab Desheila in deza dir nou - Onorab Bastienne in deza dir nou ki li in ganny viktimize akoz politik dan travay Mr Speaker).

Anba sa program 43an souvan dimoun ti ganny viktimize akoz politik dan travay Mr Speaker. En gran group Seselwa profesyonnel Mr Speaker ti kit Sesel, e ti al viv aletranze. Dimoun dan Sekter Prive ki ti annan biznes, kot zot biznes ti ganny pran, ti ganny sezi. Kot bann lotel ti ganny *acquire* dan lentere piblik ki apre ti ganny vann anba program 43an avek zot bann dalon. Avek bann dalon sa ansyen sistenm ki napa naryen pou fer avek *A New United Seychelles*.

Mr Speaker, travayer ti ganny afekte lo kote Seselwa ki ti annan biznes, ki ti investir dan zot pei Mr Speaker. Mr Speaker, anba sa sistenm ki napa naryen pou fer avek *A New United Seychelles*, kot

dimoun ti ganny viktimize e politik ti ganny anmennen dan travay, souvan en karyer dan *civil service* ti difisil pou en dimoun ki ti anvi kontribye dan son pei, si i ti annan li en diferan lopinyon politik.

Ozordi nou bezwen felisit Gouvernman Mr Speaker ki nou Gouvernman e nou Prezidan a latet nou Gouvernman, i ankouraze ki tou dimoun i partisipe pe enport ki kouler politik ou ete. In dir nou tou ki annan en abilite, met lanfaz lo abilite en sitwayen pou li anmenn son kontribisyon pou son pei, pe enport son kouler politik Mr Speaker. E sa i en sikse pou en pei ki le bouz devan Mr Speaker, akoz i pe regard tou son zanfan e ki si sa ki i kapab anmennen pou son pei.

Mr Speaker, pandan sa deba nou'n tann saler e nou'n tann dir ki mannyer si en serten Onorab ti o pouvwar ki mannyer li i ti pou donn, i ti pou donn sa bann reminerasyon. Mr Speaker, nou bezwen pa bliye ki en letan anba en lot sistenm pandan program 43an, sa letan mon krwar sa sistenm son latet ti Mr Prezidan James Michel, ki napa naryen pou fer avek zot, li koman Prezidan pei anba sa program

43an ki en lot parti. Li Mr Speaker i ti met pei an rin.

Letan pei ti dan rin, ti andete nou ti vwar ki pep Seselwa ti ganny dir “ser sang.” Zot ti met laliny pou al rod en pe Dolar, e zot ti met laliny pou al rod tout sort kalite komodite.

Mr Speaker, letan nou ti antre anba reform nou ti vwar ki nou Dolar ti sorti R5 ekek ti trouv son vre valer, saler ti enn bann keksoz ki ti ganny afekte letan nou ti rebran anba sa program Mr Speaker. Akoz nou’n toultan pin nou dolar lo R5 ekek, ki fer ki en dimoun avek en serten saler ti kapab *afford* bann komodite dan marse.

Letan Dolar ti pran son vre valer Mr Speaker ki fer i ti double, en dimoun son saler ti vo en demi sa ki i ti ete avan. Mr Speaker, sa pa ti aplik pou tou salarye dan Sekter Piblik Mr Speaker. Ti annan en serten group dimoun anba James Michel, anba Prezidan James Michel ki pa afilye ek sa parti manner mon pe konpran, sa group dimoun zot, zot saler ti double zot Mr Speaker, ki fer ki larestan popilasyon li i ti bezwen zwe *catch up* avek sa devalyasyon e son saler zanmen in kapab zwenn sa nivo ki i devret etc.

Mr Speaker, anba Prezidan Michel i ti annan loportinite pou li elev saler pou popilasyon antye, akoz pei ti pe pas dan en reform. E avek pri Dolar ki ti double, i ti double zis son saler ek son pti *click*, me non pa pou tou Seselwa dan Sekter Piblik Mr Speaker. Sa in met popilasyon an retar e ziskan ozordi nou, nou ankor pe seye.

Mr Speaker, nou Gouvernman dan sa pti kourt letan in fer pli gran logmantasyon ki Sekter Piblik in deza vwar dan lapey Seselwa! Ozordi lapey ki enkli tou bann *allowances* ki dimoun i annan ki dan sa lalis, i ganny azoute ansanm e zot ganny zot 10poursan ogmantasyon.

E si dimoun pli ba dan sa latab i ganny mwens ki R1000 Mr Speaker, son saler pou ogmante par R1000.

Mr Speaker sa i sikse en Gouvernman dan en kourt letan ki met son pep aker.

**(APPLAUSE)**

### **HON FLORY LARUE**

Mr Speaker mon’n tann dir ki person pa’n deza ganny met dan kaso anba Prezidan Danny Faure, okenn travayer pa’n ganny met dan kaso. Mr Speaker mon bezwen fer en

koreksyon, akòz Mr Bernard Sullivan ti ganny met dan kaso, letan li i ti pe fer en travay pou al rod lenformasyon kot Biro Later. Ti annan en fabrikasyon ki ti ganny fer Mr Speaker e Mr Sullivan ti ganny vin rode dan son biznes, kot son travay e i ti ganny arete pou 24erdtan Mr Speaker, lo en lakizasyon ki ti fo e i ti napa baz e i ti pirman politik e sa ti anba Mr Prezidan Danny Faure Mr Speaker.

Sa ti bann rafal kot nou ti pe antre dan eleksyon e nou koman en parti nou ti fer bann resers tanzib avek dokimantasyon ki nou ti al rode dan en biro piblik e li i ti ganny arete Mr Speaker. Alor sa Manm i bezwen *retract*, letan i dir ki personn pa'n deza ganny met dan kaso anba Prezidan Danny Faure. Mr Speaker, mon ti a kontan ou pran sa pwèn e sa ganny *retract* Mr Speaker.

*(Interruption)*

**MR SPEAKER**

15minit Onorab. Konkliir *please*.

**HON FLORY LARUE**

Wi. Mersi Mr Speaker. Mr Speaker letan mon pe konklir, mon bezwen dir ki enn bann keksoz, pli gran krim ki'n arive i letan group travayer Seselwa

in met son letan ansanm e in konstrir *Maison Du Peuple*, pep Seselwa Mr Speaker, avek zot lasyer e apre en serten parti politik ki napa naryen pou fer ek sa enn lot kote latab, solman son biro prensipal i dan *Maison Du Peuple*, in deside pran sa *building* avek pep Seselwa, letan bann fanmir, bann bokou dimoun ki la anndan e bann travayer ozordi, ti *build* sa *building* avek zot lasyer Mr Speaker.

En serten parti politik in vole in pran sa *building* Mr Speaker, Mr Speaker se sa ki nou apel lipokrizi.

***(APPLAUSE)***

**HON FLORY LARUE**

E letan mon pe konklir Mr Speaker, *TRNUC* in dir ki sa parti laba lot kote latab, in fer krim e i annan disan lo son lanmen Mr Speaker. E zot, zot bezwen rode kwa zot idantite e mon eskize, Mr Speaker letan mon dir "zot" mon pe *mean* afilyasyon zot parti, mon bezwen kler, akòz i paret mwan zot *leader* i bezwen dir nou si zot sorti dan sa parti, zot pa sorti dan sa parti. Pou nou kapab fer referans korek avek zot. Akòz "zot" lo lot kote latab Mr Speaker i sorti dan sa parti ki ti pran *Maison Du Peuple*

avek travayer pep Seselwa!  
Mersi Mr Speaker.

**(APPLAUSE)**

**MR SPEAKER**

Mersi. Mersi Onorab. Mon pou fer kler lo sa pwen.

**HON EGBERT AGLAE**

*(Off-Mic)*

**MR SPEAKER**

Onorab Aglae, si ou pe fer referans avek sa ki Onorab Larue in dir, in – *Sorry*, in dan deba, dan deba i arive ki en Manm i adres en keksoz ki en Manm in dir e i met en lot pwen. So, sa i konpletman annord.

Onorab Larue mon oule adres sa pwen parti oubyen... Mon fer en diferans ant Polisi ki en parti in swiv. Mannyer i gouvènen avek aksyon endividyel. Sa ki mon anvi anpese se ki nou akiz bann Manm isi pou bann krim ki arive koman aksyon endividyel.

E mon oule fer sir ki nou pa enkli bann Manm ki la ki pa responsab. Si zot in dan sa parti, sa ou annan toutafe rezon poudir wi zot asosye avek sa bann Polisi. Sa bann pratik ki'n arive dan lepase, me sel keksoz mon pa anvi ki ou akiz zot pou kestasyon krim endividyel.

Onorab ou ankor pe rod klarifikasyon, ki klarifikasyon? Wi.

**HON EGBERT AGLAE**

Mr Speaker mon pa pe al fer okenn *teat*, mon oule zis met lo rikord ki dan mon lentervansyon, mon ti pe fer referans avek laliberte lekspresyon anba administrasyon Prezidan Faure, person pa'n ganny arete. se tou! Si zot in al rod zot bann papye dokiman laba ilegalman sa mon pa konnen mon si zot in ganny arete. *Sorry*.

**MR SPEAKER**

*Anyway*, sa ki Onorab Larue in dir i en komanter lo sa ki ou'n fer i aksepté...

*(Off-Mic)*

**MR SPEAKER**

Non Onorab, mon pa pe al pli lwen ki sa. Mon a donn laparol Onorab Johan Loze.

**HON JOHAN LOZE**

Mersi Mr Speaker. Bonzour Mr Speaker e tou dimoun a lekout. Mr Speaker mon oule komans avek zis en *quick sidebar* pou nou bann zenn ki anler dan Galeri. Mr Speaker, mon ti oule

profit sa moman pou remersi zot pou zot prezans, mon dir zot bonzour e zis pas en pti mesaz.

*Parlman is a place for speaking! Parlman is a place for confrontation, for political conflict!* Nou sanmaye, nou bouskil kanmarad *and all is right with the word* letan sa i pas la anndan. Akoz Parlman i egzers lafors politik atraver reprezantasyon. E bann propo ki nou anmenn isi anndan menm si zot vwar nou pe bouskile, pe sanmaye i en refleksyon sa ki dimoun i panse e i santi deor.

E se sa rezon ki i annan sa konfrontasyon e sa konfli. Ou pa avans sosyete an avan atraver lapolites. Ou pa avans sosyete an avan atraver eskize donn mwan sa. Non, non, non. ou pouse, ou pouse ou fer konfli *and we resolve conflict* dan sa fason! Ou pa kapab annan *conflict resolution* si napa konfli. Se sa travay Parlman.

Souvan si ou vwar en kote ki pe *advocate* zis lapolites, li i dan son konfor. I pa anvi en lot kote *disturb* son konfor. Mr Speaker mon'n terminen ek mon *sidebar*, les mwan kontinyen.

E mon kontiny avek en lenspirasyon ki mon pran zisteman avek sa bann zenn ki la anler, akoz zot pe etidye

lansennyman. Letan mon'n swiv sa Mosyon dan sa bann dernyen zour, en lenspirasyon ki mon *draw* se ki mon eksplik li dan sa fason.

Ou annan en laklas 20 etidyan ki'n al fer legzanmen, *pass mark* i 50poursan. E enn i tonm premye, prezan lot kote latab zot tou zot pe bat lanmen zot pe aplodi sa enn ki'n tonm premye. Zot pe dir li bravo ou'n byen fer, ou'n tonm premye. Me in sorti avek 40poursan.

In tonm premye wi, me in sorti avek 40poursan. Prezan nou lo sa kote nou pe sey dir li be mon Jo, travay ankor en pe plis, serye ou, aranz ou, dres ou *bord!* Etidye, *burn the midnight oil!*

Ou konnen ki zot dir nou Mr Speaker? Zot dir nou, nou negativ akoz nou pe sey dir avek sa dimoun ki'n tonm premye e 40poursan, fer pli byen. Nou pa negativ nou, nou le i fer pli byen. Nou le i delivre pou sa pei e sa pep e nou oule i delivre pou travayer Seselwa. Nou le i tonm premye.

**(APPLAUSE)**

### **HON JOHAN LOZE**

Avek en *pass mark*. Aret tonm premye 35, 40poursan. Sa ki nou anvi. Se sa ki nou pe serse.

Mr Speaker remersi e felisitasyon, annou komans avek remersiman e felisitasyon pou tou travayer Seselwa annou pran li, annou *expand* li, e annou anmenn li depi komansman nou sosyete.

Mwan mon'n grandi dan en lepok kot *tant bien que mal* mon'n toultan ganny dir poudir ti annan dimoun Sesel depi avan kolonizasyon. Sa mon defen granmanman ti toultan dir mwan, ti annan dimoun.

Pran nou langaz Kreol, i annan en bann mo Malgas ladan tel parey mazavarou ki dan lizaz toulezour, ki nou pa ni menm konnen kot sorti, ki ler sa bann mo in antre dan *parlance commun* Sesel.

So, Sesel enn i annan en listwar ki posibleman bokou pli gran ki nou, nou konnen ki'n ganny rekonnèt, ki'n ganny ekrir dan liv.

Be, i anmenn mwan lo pwen Mosyon, remersiman e felisitasyon. Zot be Kreol lontan pe bezaye dan sa pei! Lontan pe limen sa Kreol la! Pa ozordi in komans travay. Prezidan Ramkalawan menm toultan i dir nou ki poudir kot Legliz laba ti ganny batir par bann mason Seselwa, tou sa semen, danm tousala in ganny batir e konstri par Seselwa.

E la nou pa pe koz 43an Onorab Flory Larue. Nou pa pe koz apre sa koudeta kot *Docteur* Jean, Maxime, Desire, Ferrari ti limero 2 dan sa parti ki ti fer koudeta! E son garson Minis Ferrari ti pe marse ek en fizi anvil kot Lorloz zour koudeta! Nou pa pe refer lo la, la. Nou pe pran nou listwar an antye pou nou remersi, rekonnèt e felisit travayer Seselwa!

Nou bezwen selebre zefor ki'n ganny fer, kouraz ki'n ganny mete. E mon pa konpran ki mannyer sa Mosyon in vin koumsa Mr Speaker, mon pa konpran ki mannyer in pas *the bar of admission* lafason ki in ganny ekrir.

E letan nou get dan Parti LDS Mr Speaker i annan ou, *you are a scholar*. Nou annan *Maître* Georges *another scholar*. Be kan mannyer keksoz koumsa i pase? Kan mannyer sa i ganny admet dan Lasanble Nasyonal?

E zot realize ozordi i dernyen *sitting*, dernyen 2 *sitting*. E nou koman en parti nou pare pou ed zot pous program Lezislasyon Gouvernman. Dan plas vin ek Lalwa napa en Lalwa sa 2 dernyen zour, ki nou vwar? Gouvernman i sakrifye son program Lezislasyon pou

anmenn en bann Mosyon ki flat Gouvernman.

E si zot pa oule krwar mwan, napa zis enn, get 3enm Mosyon lo *Order Paper*. Li i kareman flat Gouvernman li, Gouvernman i anvi ganny flate. So, nou pa pas Lalwa, napa Lalwa sa semenn. Napa Lezislasyon, i annan flate. Konmsi seryezman Mr Speaker? Seryezman *Maître Georges*? Nou'n ariv sa deba. *Anyway*, nou kontinyen.

Mr Speaker, nou bezwen annan felisitasyon e remersiman pou tou sa ki'n ganny pouse dan Gouvernman depi ki *LDS* in vin o pouvwar. Nou bezwen remersi bann ki'n ganny pouse. Bann ki'n ganny akize konmkwa zot ti pe al met dite dan, met pwazon dan dite Prezidan, selman *case* pa'n ariv kot lapolis.

*Case* pa'n zanmen ganny fer. Mazinen, *attempted assassination on the Head of State* of mon pei! Dimoun i ganny pouse travay, selman lapolis pa fer *case*, pa ganny raporte avek lapolis?

Zot vwar konmsi nou parey dan en Sesel *Trump* la. I annan sa pti madanm ki ti kontan koze Lanmerik lontan, ti dir Prezidan *Trump* i koz lo *alternative facts*. Zot osi zot in vin *alternate facts* konmela.

Mon kontan pe zot evolye, zot pe devlope. Me zot devlop dan tou move direksyon ler mon pe get zot.

So, annou remersi bann dimoun ki'n ganny pouse mal a propo dan travay. Annou remersi e felisit bann dimoun ki zot kontra in ganny terminen. Zot in ganny dir ou kontra pa pou renouvle, mersi *so long, bye-bye*. Be selman reste ou trankil akoz ou pa pou ganny ou bann benefis konmela.

I annan dimoun ziska ozordi pe esper zot benefis en, apre ki zot kontra in ganny terminen. Be reste ou trankil pa bezwen al lo *Facebook*, pa dir naryen, sirtou pa bezwen al laba kot *United Seychelles*. Pa bezwen koz avek Sebastien Pillay. Ou bann benefis pa ankor pare, espere ou a ganny ou bann benefis apre.

Dimoun in travay, in limen en? Zot pa donn li son benefis selman toudmenm. Annou remersi, felisite, bat lanmen pou li akoz nou annan en boug ki li in sorti premye avek 35poursan.

So, remersiman, remersiman e felisitasyon pou nou bann pansyoner ki zot, zot in ganny dir ki zot bezwen esper ankor 2 an avan zot tous zot pansyon apre ki zot bezaye, zot in limen dan sa pei pandan

plizyer lannen. *A whole lifetime of work.*

Prezan sa ki gou avek sa, sa ki li i egzekit sa desizyon i dir avek nou bann pansyoner, anr ou konnen Danny Faure ki ti deside par mwan, mon bezwen. Selman li in ganny elekte pou fer sanzman! Ou ganny elekte pou fer sanzman, selman ou sanzman ou enplimant sa ki Danny Faure ti pou fer.

A, avan ti'n fini anonse ti pou fer depi avan, oparavan. Selman ou manda ki ou'n ganny elekte lo la, se sanzman. Eski pa apel vol konfyans sa? Pa li menm sa ki Kreol i dir ou kouyonn servis sa? Mon krwar li menm, non?

Be ou vwar ki arive letan zot sorti premye avek en *pass mark* 25 pousan? Se sa, ou'n sorti premye ou, me selman ou'n ganny 25 pousan e *pass mark* li i 50, vwala!

Mr Speaker, annou kontinyen. Remersiman e felisitasyon pou nou bann pti biznes ki pe ganny bouskile partou kot i ete dan tou pti trou ki i ete, avanse sorti la nou bezwen la pou donn Arab. Nou bezwen la pou donn entel. La nou pe al fer tel. Avans laba, pouse, bouskile ganny *disturbed*. Me nou bezwen *still* annan remersiman e felisitasyon pou zot, aköz zot pe

kontribye dan sa lekonomi. Zot pe limen, zot pe rente, zot pe travay, zot pe bezaye dan sa sosyete ki apel Sesel!

E nou bezwen remersi zot, e felisit zot. Menm si bann ki'n sorti premye avek 15poursan i pa'n ganny son *pass mark* 50, pe kre sityasyon ki presidir enposib pou li. Be, mon krwar nou ava kontinyen Mr Speaker, nou a gete si i annan ankor pou nou remersi.

Ah, remersiman pou nou bann *carers*, zot rapel nou bann *carers*? Nou ti dir zot pe al ganny anploye anba lazans, zot rapel? Ler Lalwa ti vini la, nou pa ti lir Lalwa nou. E mon rapel i annan en Manm ti dir "bann *carers* zot pa zis bann anplwaye sa lazans, zot osi en zanmi pou zot pasyan, pou zot kliyan" en zot pa anplwaye lazans? Wi, zot pa okenn de anplwaye lazans. Lazans pa'n anploy zot. Be pourtan zot, zot ti dir *carer* pou ganny anploye, *carer* pou nobou pran *loan*. La in bon la, *carer* in ganny R500, in bon la.

*Carer* anploye avek lazans, be kan. *Carer* i anploye ek son kliyan. Lazans li i asiz ant *carer* ek kliyan personn pa kapab konnen ki i fer, ki i pa fer. Ou vwar? Zot ti ava lir zot Lalwa. E koman mon lo bann ki lir Lalwa la. Mr Speaker, mon'n tande poudir anba Prezidan



Michel. Prezidan Michel ti double son saler, me sa ti 2008 sa, ti 2008 zot rapel? Me zot pa bliye ki mon'n deza dir zot lo sa?

Be *Leader* Lopoziyon sa letan i ti al negosye sa zafer li! Be Ramkalawan ti al negosye. Onorab Ramkalawan ti al negosye sa logmantasyon saler, ki Onorab Flory Larue pe koz lo la. Sa en bann ti double la, be Ramkalawan ti parmi, Onorab Ramkalawan *Leader* Lopoziyon sa letan. Apre ler ti vin dan Lasanble pa ti koze person lo sa *Bill* la.

Sa Lalwa la, ti koz zis Mrs Potter avek Mr Ramkalawan. Me ti annan en laranzman...

**MR SPEAKER**

Onorab be ki mannyer ou fer pou konn tousala, si ti pas antyerman prive ant zot 2? I sanbleman ...

**(APPLAUSE - LAUGHTER)**

*(Interruption)*

**HON JOHAN LOZE**

... negosyasyon, mon ava dir ou tou kot ti pase. Mwan sa letan - La mon a dir ou la, la mon a dir ou la!

**(APPLAUSE - LAUGHTER)**

*(Interruption)*

**MR SPEAKER**

*Order!*

**HON JOHAN LOZE**

Mwan sa letan mon ti travay koman *research officer* dan *Caucus*.

*(Interruption)*

**MR SPEAKER**

En pti moman.

**HON JOHAN LOZE**

Mon pou dir ou - ou'n demann mwan ou pou konnen la... Ti vin diskite avek nou *Caucus!*

**MR SPEAKER**

Esper mwan, esper mwan. Mon'n zis dir sa pou montre poudir ou pe fer serten alegasyon, serten enplikasyon...

**HON JOHAN LOZE**

Baze lo fe!

**MR SPEAKER**

...ki nou pa kapab verifye.

**HON JOHAN LOZE**

Be ou kapab verifye! Dimoun i ankor vivan. Mrs Potter i vivan.

**MR SPEAKER**

Ale kontinyen.

**HON JOHAN LOZE**

*Dr Herminie* ti donn son *conference room* laba kot *library* kot negosyasyon ti pase! Prezidan Faure i ankor vivan, i ti dan sa negosyasyon li osi.

*(Interruption)*

**MR SPEAKER**

Ok, lord silvouple!

**HON JOHAN LOZE**

Be Mr Speaker be zot tou ki ti la sa letan zot konnen!

**MR SPEAKER**

Lord silvouple, Onorab Larue mon pe demann ou obzerv lord. Mersi. *Ok* Onorab kontinyen.

**HON JOHAN LOZE**

Be negosyasyon ti ganny fer, be letan nou ti ganny *briefing* ou konn en keksoz ki nou ti ganny dir. Ler in anmenn kot *Caucus SNP*, sa premye saler ki ti ganny propoze zot pa ti aksepte. Ou rapel Mr Speaker? Ou rapel Mr Speaker? Onorab Georges tou ti la.

**MR SPEAKER**

Non, ditou mon pa rapel naryen ladan.

(  
laug  
hter)

**HON JOHAN LOZE**

Be zanmen ou pou rapel, zanmen ou pou rapel.

**MR SPEAKER**

Pa demann mwan si mon rapel. Mersi.

**HON JOHAN LOZE**

Me selman, ou konnen ki letan sa? Ler i ti fer sa *speech* lanmans pwalon i so. Par ler ou pa kapab dormi. Ti ler pou mont saler sa. I ti ladan Mr Speaker, i ti negosye logmantasyon son saler. Sa initil zot *challenge* mwan lo la sa enn.

Mr Speaker, selman annou kontinyen avek nou bann remersiman. Remersiman pou tou bann ki'n perdi zot *long service allowance* ouswa ki pou al perdi zot *long service allowance*.

E nou tou nou'n tann *Chief Secretary* kot ti dir poudir Gouvernman pa neserman anvi *retain*, zot le performans. Mr Speaker eksplik mon en keksoz en, nou pa anvi *retain nurse? Teachers? Polisye?* E

(  
laug  
hter)

*teaching* i en vokasyon, *nursing* i en vokasyon. Letan en dimoun i antre *nurse* i en *nurse*. *Basically, for the rest of* son lavi. E lamazorite zot, zot reste *nurse* dan lopital.

*Teachers* osi parey. Zot reste *teachers* ek Minister Ledikasyon. Zot ganny zot en *long service allowance* ki esansyelman en *retention allowance*. Be kot ou le *teachers* al prezan, apre ki in fer 5an i ganny li en sonm larzan pou *retain* li. 10an ankor, 15an ankor.

Be ki ou le zot fer? Nou pa le *retain*. Nou pa le *retain teachers*? Be ki *teachers* pou fer? *Teachers* i la *to serve throughout* son karyer koman en *teacher*. *Nurse* i la *to serve throughout* son karyer koman en *nurse*. E la son *retention allowance* i evapore baze lo en bann zafer zistwar ki zot pa'n ni asize pou kalkil le zot menm. Zot napa en lide ki zot pe fer avek zot *pass mark* 5poursan kot zot in tonm premye dan laklas ek zis 5 lo 100!

Ou vwar ki arive letan ou tonm premye ek 5 lo 100. Ou en *teacher* ou Mr Speaker, ou konnen ou. E zot, zot kontinyen bat lanmen pou li, "Bravo Boboy ou'n tonm premye!"

Bon, annou gete si i annan remersiman ki nou

kapab fer. Remersiman pou tou travayer servis piblik ki lo kontra. Ozordi zot napa en nide kot zot debout avek sa bann nespes melimelo logmantasyon saler ki sa Gouvernman in anmenn si i par lipye, si i par latet. Zot pa konnen ki zot pe gannyen, konbyen zot pe gannyen e ki zot sityasyon ozordi.

Be ki mannyer nou kapab fer sa avek dimoun? E nou menm nou, nou pa ni konnen ki nou pe fer. Nou donn en bann *interview*, nou dir nenport kwa. Nou donn enn ek TeleSesel, nou donn lot ek *SBC*, nou dir en bann zafer. Nou devi nou lizye nou get anler sak fwa pou nou koz lalang.

### **MR SPEAKER**

15 minit Onorab.

### **HON JOHAN LOZE**

Mersi Mr Speaker. Mr Speaker mon le terminen par remersi tou Seselwa ki'n vin propriyete zot prop later. Tou Seselwa ki'n aste li en lakaz, ki'n aste li en flat pandan sa 43an. Tou Seselwa ki'n ganny akse avek sa distribisyon larises ki parti *United Seychelles* in fer.

Tou Seselwa ki pran li en bout later endistriyel pou devlope pou fer son biznes lo la. Ki nou'n partaze, nou'n repartir

larises pei. Tou sa lakaz dan tou sa *industrial estate* ki Polisi nou parti in met an plas.

Sa 150 propriyeter later endistriyel Providence ki zot ti pou vin met o piblik le zot in vini. Be zot pa'n zanmen kapab fer li akoz zot in ganny sok. I plen ek zot bann *sponsors*. I plen avek zo bann siporter. I plen ek zot bann aktivis prezan zot kanmi zot pa kapab tir sa lalis.

Mr Speaker, mon remerisi tou Seselwa ki'n kontribye dan sa pei, be mwan mon demann zot en gran leskiz. Mon pa dan sa Lasanble pou mwan ni flate, ni lise, ni fer naryen ki pou *pamper* zot Gouvernman avek son frazilite maskilen. Zot ava eskiz mwan, mon pa la pou sa. Onorab Porice donn en lape lev ou lanmen ou a koze.

Mr Speaker, mon pa pe vote pou sa Mosyon! Mersi Mr Speaker.

**(APPLAUSE)**

**MR SPEAKER**

Mersi. Onorab pa bliye ou adres Speaker e pa en Manm lot kote latab. Mersi.

**HON JOHAN LOZE**

Mon demann leskiz Mr Speaker.

**MR SPEAKER**

Onorab Naidu. *Point of order* Onorab Henrie.

**HON GERVAIS HENRIE**

Mr Speaker, anba *Order 6 (1)(d)* pou koriz en *misapprehension* lo bann fe ki entervenman ki'n fek pran laparol in met devan Lasanble.

A de repriz in *mislead* Lasanble Nasyonal e piblik Seselwa. Mwan mon ti en Manm dan katriyenm Lasanble letan ti annan reform ekonomik 2008.

I pa korek ki Manm in dir poudir saler Manm Lasanble ti double. I pa korek, i pa en fe ki korek sa akoz sa letan saler ti sorti pou en Manm Lasanble R8mil ki nou ti pe ganny peye avan 2007, e i ti monte pou vin R13mil. Si matematikman nou gete i pa double *from 8 to 13*.

E dezyenman letan in fer referans avek diskour Prezidan kot i ti dir 'lanmans pwalon i so', i *factually incorrect* akoz sa *speech* ti vin apre ki i ti perdi eleksyon 2011.

I ti retourn dan Lasanble koman en Manm Lasanble. Nou a rapel poudir eleksyon prezidansyel an 2011 pa ti fer ansanm ek Lasanble Nasyonal. Ti vin prezidansyel avan apre, e sete la ki sa *speech* ti ganny fer.

So, in fer de *statement* ki pa korek *factually*. Mersi Mr Speaker.

**MR SPEAKER**

Mersi pou ou koreksyon.

**HON JOHAN LOZE**

*(Off-Mic)*

**MR SPEAKER**

Onorab nou pa kapab antre dan en deba. Ou ou'n fer en *statement*, ou ou'n fer en *statement*, li in fer en *statement*.

**HON JOHAN LOZE**

*(Off-Mic)*

**MR SPEAKER**

Non! Onorab Naidu ou annan laparol.

**HON SATHYA NAIDU**

Mersi Mr Speaker. Bonzour Mr Speaker. Bonzour tou koleg Onorab. Bonzour bann zenn ki dan Galeri ki pe swiv sesyon ozordi. E tou dimoun St Louis ki a lekout ki pe swiv.

Mr Speaker, i donn mwan en gran plezir pou mon prezant mon pwennvi koman en Manm Elekte. E an menm tan itiliz sa moman pou felisit nou bann travayer.

Nou bann travayer dan Sekter Prive, ouswa menm Piblik ki'n donn tou zot kouraz

pandan sa dernyen 2an edmi. Wi nou bezwen fer referans avek 2an edmi akoz i fer 2an edmi depi ler ki in annan en sanzman.

Kot nou'n pran en sistenm 43an e nou'n met li a kote. Sa i baze lo lavolonte en pep ki'n donn Wavel, John, Charles Ramkalawan 55poursan e dan ka St Louis 59.9poursan.

Zot i oule sanz fason fer lo lafason ki pei i fonksyonnen. Lo lafason ki sistenm gouvrenans i opere. E in annan pa mal transformasyon dan sa direksyon pou nou kapab asire ki i annan bokou plis efikasite.

Nou annan en Gouvernman ozordi kot larzan *taxpayers* pe ganny byen itilize. E sa i reflekte lo rapor par Oditer Zeneral ki'n fer resorti poudir ki i annan disiplin fiskal. Be sa bann rapor Oditer Zeneral ki *FPAC* dan lepase e menm sa enn ki la pe depouye, partou kote dan tou sa bann departman ou vwar *mismanagement!* Ou vwar *mismanagement!*

Sa pei i konnen mannyer pou zer larzan sa *taxpayer*. E lo lot kote latav atraver ou Mr Speaker. Onorab Lemiel ti'n dir ki sa sistenm 43an ki'n fer sa bann travayer. Be nenport ki Gouvernman ki la i annan en

responsabilite anver son pep pou fer sir ki i annan ledikasyon, akse avek lasante, lozman. I dan Konstitisyon sa!

E an plis ki sa, tou sa bann servis se *taxpayers* ki donnen. Napa naryen ki gratwit!

**(APPLAUSE)**

**HON SATHYA NAIDU**

Alors sakenn de zot in zwe en rol pou sa pei ariv kot in arive. E se pa zis gras a *US*, ki apel *US* ozordi. Mon pa konnen ki manner zot pou apel zot demen. Me i annan en non ki mon pou servi koman en abrevyasyon. Me selman sa pep i konnen.

Me an relasyon avek sa, Onorab Lemiel atraver ou Mr Speaker ti'n dir ki sa bann menm travayer, napa resours. Be ozordi zour ki sa sistenm gouvrenans ki nou erite kot nou pe dir napa resours. Napa resours se gras a ki? Gras a sa sistenm ki'n la.

E nou bezwen fer referans avek sa sistenm aköz nou'n erit sa nou. E nou pe sey travay avek sa ki nou'n erite, avek mwens ki nou annan baze lo sityasyon ekonomik ki pei pe pas ladan ozordi, pou nou kapab delivre en Sesel ki bokou

pli meyer. E nou'n fer en kantite.

Ozordi *COVID*, mon pa pe koz, mon pe koz san *en mask*. E pou sa mon bezwen remersye Dr Gedeon ki'n pas lo televizyon *week in, week out* pou edik nou bann dimoun. Mon bezwen remersye tou bann ners ki'n travay lizour ziskan aswar. E en bon pe zot ki'n menm ganny enfekte.

Me eski savedir ki Prezidan ki annan tor ki en dimoun in ganny enfekte avek *COVID*? Eski sa kalite *statement* i kapab ganny tolere, soutire par bann lezot koleg lo lot kote latab? Pou pa koriz son prop koleg pou dir i mal pou nou kapab pran sa semen. Selman zot, zot pou vin edik nou manner nou bezwen koz dan sa Lasanble. *Come on!*

An relasyon avek *COVID*, i annan en bon pe pei ki'n pas dan en kantite difikilte. E dan larezyon, mon fer referans avek *Sri Lanka*. Rezon mon pe fer referans avek *Sri Lanka* se aköz zot lekonomi i en pe parey pou nou. Zot ti neglig Sekter Lapes avek Lagrikiltir. E zot ti'n met tou lanfaz lo tourism. Me zot pa ti konnen ki manner eski zot pou kapab fer zot pei re debout e bouz de lavan.

Me tandis ki nou Gouvernman nou'n ganny akse

avek vaksen a tan. Gras a en Prezidan ki pe travay ekstrememan dir. E pou sa bann vaksen la, laplipar bann vaksen in gratwit. E akse avek vaksen in permet nou pou kapab kre bann *travel corridors* dan en moman kot laplipar bann pei zot frontyer ti ankor fermen.

E nou ti'n bezwen pran en desizyon brav e byen kalkile pou nou reouver sa frontyer, pou kapab asire ki nou kapab *jump start* nou *Tourism Industry*.

Akoz se sa ki pilye nou lekonomi e nou Gouvernman pe sey met lanfaz dan Sekter Lapes ek Lagrikiltir pou bouz delavan. E nou'n vwar pa mal devlopman pandan sa dernyen 2an edmi. E mon bezwen felisit tou bann travayer, enkli bann travayer spesifikman dan Departman Tourism ki'n pran bann desizyon byen kalkile pou kapab asire ki nou'n ariv kot nou arive.

E an menm tan, an referans avek sa ler nou pe koz lo nou Sekter *Tourism* i fer mon mazin *Air Seychelles*. Nou'n annan de deba dan sa Lasanble kit in annan kestyon ki nou demann SS Payet avek Mr Damien Thesee ansanm avek Minis Hassan.

Kot menm *Leader* Lopoziyon in poz kestyon lo sityasyon vizavi *Air Seychelles*. Me zour nou Gouvernman i deside pou kapab *cut off the debt* e fer sir ki nou *fly the Creole Spirit*, nou pa vwar okenn kestyon lo sa kote.

Nou pa war okenn remark ki ganny fer pou dir felisitasyon, zot in fer en bon louvraz. Zot pa dir. Solman pou kritike, me zot pa ni kritike dan en fason ki konstruktiv. Tou zot kritik i destruktif e i pa pou anmenn nou okenn par!

E dan sa Lasanble, semenn pase mon ti'n lans en lapel avek bann dimoun ki serye. Ki le antre dan politik. Pou bann dimoun ki mon pa pou konsider zot koman en komodite lo letazer, pou bann dimoun ki annan lentegrite. Vin devan aköz nou bezwen en Lopoziyon ki serye bann la.

**(APPLAUSE)**

### **HON SATHYA NAIDU**

Mr Speaker, ozordi nou bezwen osi rekonnèt ki in annan desizyon ki difisil ki nou'n bezwen pran. Lot kote latab zot in fer referans avek laz ki nou'n bezwen fer monte pou Sekirite Sosyal. In annan pa mal diskisyon kot in annan lo kote Fon Pansyon. Kot sa Nasyon an

antye in bezwen ganny sansibilize pou dir akoz nou pe pran sa desizyon.

Enn bann rezon se akoz nou annan en Sekter Enformel. En lot se lo kote kontribisyon volonter pa en bon pe ki pe kontribye. E apre nou annan 10poursan nou bann zenn zonn ek fanm ki dan drog.

E nou annan en popilasyon ki pe viv pli lontan. *And the cost that would come with it in the long term is too high and we will not be able to sustain it!*

Gouvernman lepase sa ki zot ti fer se, *they were trying to sustain the unsustainable.* E nou pa pou kapab fer koumsa. Nou bezwen pran bann desizyon ki difisil. E an relasyon avek sa, nou bezwen realize ki sa 10poursan ki mon'n fer referans avek se sa ki nou nou'n erite. E ozordi mon le felisit sa 10poursan ki dan sibstans, ki nou'n erite. Nou bezwen rod en fason ki mannyer eski nou kapab bouz de lavan. Pou nou kapab adres sa gran defi.

Me an relasyon avek sa i annan pa mal travay ki pe ganny fer par nou bann *Coast Guard*, par nou bann zofisyè dan lapolis ki onnet e senser anver sa latas nob.

Me in annan desizyon ki nou, nou bezwen pran pou *dismantle ANB*. I dan domenn piblik sa lenformasyon. Dimoun ordiner i konnen ki en zofisyè i donn en *call* pou kapab fer sa eskobar konnen ki i pou annan en *deployment*.

Selman *Leader* Lopoziyon atraver ou Mr Speaker, i anmenn en *PNQ*. Konmsi i ape defann sa bann travayer. Mon pa pe dir tou sa bann travayer in enplike dan en ka koripsyon, ouswa en pratik ki koronpi.

Me in annan pa mal zot. E nou bezwen pran en desizyon e ozordi nou annan bann zofisyè ki senser. E mon'n demann zot pou kontiny sa travay. E lo nou kote sa kote latab nou pou donn zot tou sipor neserer.

Mr Speaker, lo size promosyon dan lanplwa ozordi. Promosyon dan lanplwa i arive pa baze lo afilyasyon politik. Dan lepase koumsa ki ti'n marse. Si ou ti afilye ou avek en parti politik ou ti pou ganny ou promosyon. Ouswa si ou pa ti afilye ou avek sa parti politik, zot ti pou tir ou dan travay. Nou pa krwar dan sa sistenm, nou krwar dan Sesel pour ou son zanfàn. Kot tou zanfàn Sesel i ava ganny en loportinite egal. Pa baze lo afilyasyon politik, me baze lo zot kalifikasyon.



Nou krwar dan en sosyete ki baze lo *meritocracy* e non pa lekotrè. Nou krwar dan en sosyete kot ou bezwen travay pou ou ganny ou lapey lafen dimwan. E mon vwar Mrs Mohideen pe pous en azanda ki vreman pozitiv, kot i pe sey promouvwar en lapey lo baz performans.

E dan sak *band* i annan bann *steps, step 1 to 15*. Mon panse nou kapab itiliz sa koman en *scale*, en *sliding scale* pou sa ki pli performen lo bann kriter ki pou ganny etabli pou zot ganny en lapey.

E pou bann ki pe plennyen pe dir napa *long service allowance, this will be another component that could be fitted in* pou nou kapab regle sa dan en fason ki bokou pli pozitiv e konsistan avek azanda ki nou Gouvernman i annan.

E sa pep la deor i le ki nou annan en Sekter Piblik ki pe fonksyonnen dan en fason ki efikas e non pa lekotrè.

Me lot kote ou annan en parti politik ki pe dir ou anmenn travay dan politik. Nou le tir sa kalite fason fer Mr Speaker.

An relasyon avek *dead wood* dan servis piblik, i annan pa mal diplikasyon osi. Sa osi nou bezwen revwar. Ou pa pou kapab annan 2 dimoun ki pe fer

menm louveraz. Plito ou *consolidate the post* e ou donn li en pe plis responsabilite. An menm tan ou fer monte son lapey.

Lasanble i annan en bon pratik, sak travayer i ganny en zour koman en *Wellness day*. Sa i en keksoz ki mon krwar ki laplipar bann departman dan servis piblik ou menm prive i kapab konsidere. An menm tan, mon ava al lo size *paternity and maternity leave*. Ok. Pou bann zonn nou, nou ganny 2 semenn be selman bann madanm i ganny 4mwan. Me selman nou pe dir bann papa i bezwen pran responsabilite vizavi zot zanfan.

Mwan mon krwar sa size i bezwen ganny get en kou ladan, pou nou kapab pran en desizyon ki favorab pou osi bann papa. Akoz nou ozordi Gouvernman LDS nou pe promouvwar bann prensip ki relye ouswa anliny avek en pep ki bokou pli responsab.

Mr Speaker, an menm tan nou osi bezwen regard lo bann travayer zot menm, kekfwa dan lepase in annan en tandans pou pa kestyonn zot Siperyer. Akoz si ou kestyonn ou Siperyer *you are out!*

Me selman ozordi nou bezwen kapab kiltiv sa lanvironnman kot ou bezwen kapab kestyonn zot Siperyer.

Kot ou bezwen kapab met sizesyon pou non selman amelyor ou lanvironnman dan travay, me selman pou asire ki ou lorganizasyon i perform pli byen. Alors i enportan ki sa lespri i ganny kiltive dan lespri tou bann travayer, pou kapab fer le lesansyel lo sa kote.

Mr Speaker, a plizyer repriz in annan *PNQ* ki'n ganny anmennen par *Leader* Lopozisyon, lo bann vwayaz ki Prezidan in fer.

Me eski ozordi *Leader* Lopozisyon i pa pe reprezant Lasanble Nasyonal atraver en travay ki i pe fer Lasin? Ou konpran? Me selman ler Prezidan i ale i vin en problem. Me selman ozordi li menm li in vwayaze.

I annan menm bann Manm Lasanble Nasyonal nou vwayaze pou nou kapab deservi serten responsabilite, ouswa pou agrandi nou konnesans lo en serten size. Me selman menm si zot al laba zot dir Prezidan pe vwayaze. Selman zot osi zot vwayaze, zot osi zot ganny en *per diem* i ganny aprouve par Minis Finans, Departman Finans. Me ki manner ou apel sa? Zot met zot palto tou! *Ok?*

**MR SPEAKER**

15 minit Onorab. Konkli *please.*

**HON SATHYA NAIDU**

*Ok* Mr Speaker. Me Onorab ou'n koze les mwan koze!

**MR SPEAKER**

Onorab! Onorab!

**HON SATHYA NAIDU**

Parol in tro for? Mr Speaker...

**MR SPEAKER**

*Order!*

**HON SATHYA NAIDOO**

*Yes.* Mon oule premyerman - *I mean* pou terminen plito, felisit bann zenn ki'n pran sa desizyon pou rantre dan en karyer ki vremen enportan. Mankman *teachers* in en size ki'n lo latab pou plizyer lannen e i reste en defi ki nou Gouvernman dizour i pou bezwen adrese.

Me selman mon apresye ki zot in pran sa desizyon. E an menm tan i enportan ki mon dir sa Mr Speaker. Nou lo kote *LDS* nou refize pran okenn lesan avek *US*. *US* napa okenn lesan pou donn nou dan politik.

***(APPLAUSE)***

**HON SATHYA NAIDU**

Akoz nou pou refiz fer koudeta, touy dimoun, egzil dimoun, fors dimoun kot zot biznes i ganny pran, zot propriyete i ganny pran lo afilyasyon politik! Nou krwar dan en sosyete kot i annan *rule of law!* Mersi Mr Speaker.

**(APPLAUSE)**

**MR SPEAKER**

Mersi. Mersi. Onorab nou'n ganny tro bokou retar avek. Ale ki *point of order?*

**HON JOHAN LOZE**

Mersi, Mr Speaker ankor mon al anba *Order 8 lo decorum of the National Assembly* fason ki ou *conduct business*. E mon oule *reiterate* sa pwen lo keston biznes Lasanble Nasyonal aletranze.

Mon en Manm mon pa *travel* ditou mwan, mon pa al okenn *international business*.

Depi sa dernyen 2an edmi mon krwar Onorab Pillay i fer li son dezyenm misyon ofisyel ki i ale si i pa son premye. E mon pa konpran ki mannyer Manm pe *call* travayer Lasanble, travay misyon Lasanble *into question* e si sa lapant i ganny pran nou tou nou pou pran li la anndan aprezan. Mersi Mr Speaker.

**MR SPEAKER**

Fransman mon pa krwar poudir i annan en *order* ki'n ganny mal obzerve oubyen ki'n ganny inyore.

In fer en referans avek *Leader* Lopozisyon ek vwayaze, *that's it*.

Onorab Monthy ou annan laparol.

**HON PHILIP MONTHY**

Mersi Mr Speaker. Bonzour Mr Speaker. Bonzour tou dimoun a lekout. Bonzour tou travayer Seselwa. E bonzour spesyal tou bann etidyan *SITE* ki la dan Galeri. Koman en *teacher* par profesyon, mon apresye karyer ki zot in swazir. E *SITE* i osi dernyen landrwa dan servis piblik, kot mon ti travay avan mon ti pran desizyon pou vin dan politik.

Mr Speaker, ler mon'n ekout Onorab Loze atraver ou koze la bomaten, in koz lo felisit sa ki'n *pass* legzanmen par 5poursan.

Me si en dimoun in *pass* en legzanmen avek 5poursan nou annan drwa felisit li. Onorab Vidot ti *win* eleksyon Roche Caiman par 5 vot, nou pa pou felisit li.

**(APPLAUSE)**

**HON PHILIP MONTHY**

Omwen, omwen Onorab Vidot in annan kouraz pou pas sa legzanmen. Li Onorab Loze ni antre dan lasal legzanmen i pa'n antre!

**(APPLAUSE - LAUGHTER)**

**HON PHILIP MONTHY**

Selman i vin koz bon labous la dan Lasanble Mr Speaker.

**MR SPEAKER**

Ok retourn lo Mosyon prezan Onorab.

**HON PHILIP MONTHY**

Mon ava retourn lo Mosyon Mr Speaker. Mr Speaker, pandan sa preski 2an edmi depi dernyen eleksyon mon'n ganny sans temwanny plizyer reaksyon anver sa sanzman, ki Lepep Seselwa ti par son prop volonte ede pou anmennen dan sa pei.

Kot pou plis ki 40an ti pe ganny dirize zis par en group dimoun ki zot priyorite sete pran desizyon ki fer zorey kontan, me ki ti souvan danzere e iresponsab anver stabilite ekonomik e sosyal sa pei ki apel Sesel.

Mr Speaker sak desizyon ki ou pran, i vin avek en serten nivo responsabilite. Akoz mon konn tre byen ki en desizyon i vin avek bann retonbe ki kapab

pozitiv, me ki osi byen kapab annan bann reperkisyon negativ lo sa bann ki pou direktman ganny touse par sa desizyon ki pe ganny pran.

Akoz mon'n konmans koumsa Mr Speaker, se tou senpleman akoz depi dernyen eleksyon ler ou pran kont sa klima ekonomik mondyal anba lekel nou ti vin dan gouvrenans, ti neselit serten desizyon ase rapid, brav e byen kalkile. Akoz si dan bann tel lenstans, bann move desizyon ti'n ganny pran tou travayer Seselwa, tou propriyete biznes, tou sitwayen e pei an zeneral ti pou dan en gro problem.

Kontrerman parey Onorab Lemiel atraver ou Mr Speaker in oule fer nou krwar, pa parti US ki'n donn nou sa pei. Me plito pep Seselwa atraver bwat vote ki ti konfyete direksyon sa pei avek *LDS* ...

**(APPLAUSE)**

**HON PHILIP MONTHY**

...apre ki zot ti'n fatige avek sa bann bater latet ki'n la pou plis ki 40an. Ler mon pe get sityasyon Sesel ozordi e mon konpar li fas a plizyer lezot pei, tel parey Maurice ki zis la 2 pa obor nou, mon vwar ki sa pei in sorti dan en tanpet terib. E pe

dousman, dousman diriz ver laklerte, boner e prosperite.

Si zot pe ensiste ki nou'n ganny sa pei lo en plato, mon a dir zot ki sa ti en plato dekoke parey sa *track* laba Stad Linite pe pouri parey tou sa bann lenfrastruktir deplorab ki zot in kit deryer, ki prezan sa Gouvernman pe bezwen rod resours pou kapab remet tousala dan son leta ki i sipoze ete.

Mr Speaker, menm si nou pe kontinyelman vwar bann mannev pou esey detourn latet Seselwa, pou tir latansyon lo sitwayen, lo bann keksoz pozitiv ki'n arive e ki pe kontinyen arive, me pe o kontrer donn lenportans tou sa ki negativ e zot pe lager lebra kase pou senm dout dan lespri Seselwa, Seselwa la deor pe dir klerman, "US zanmen ankor!"

Mr Speaker, si ozordi pandan ki plizyer pei pe ankor vwar zot dan gran difikilte ekonomi e zot pep pe fer fas avek bokou difikilte, e pozisyon sa bann pei lo bann lendeks mondyal pe ganny *downgraded*, isi Sesel menm si tou pa perfe nou dan en pozisyon ki tre favorab. Zis sa bann ki refize ouver zot lizye ki pou dir ou otreman.

Si ozordi Sesel in en tel pozisyon kot nou'n sorti dan

presipis e tou prozeksyon pe prevwar en lavenir briyan pou sa pep ki'n pas sitan martir anba sa ansyen rezim, i pa zis akoz sa travay ki Gouvernman LDS in fer.

Me i rezilta travay ki tou travayer Seselwa, ki swa dan Sekter Piblik ou Prive in fer pandan bann peryod kot defi ek lensertitid ti rennyen dan nou pei. E pou sa mon pou felisit zot Mr Speaker.

Pou zot lwayote anver nou pei byenneme Sesel e anver zot konsyans ki nou tou konman en imen Bondye in donn nou enn.

Mr Speaker, parey mon'n souvan repete la dan sa Lasanble, sa pei ki apel Sesel i pou nou tou e ler pei i prospere nou tou nou benefisye. Pe enport ou lopinyon ou afilyasyon politik.

Ler ou en vre patriyot ki mazin byennet pei, dabor avan benefis personnel ou politik listwar pou mazin ou konman sa dimoun ki ti annan sa lasazes e grander lespri ki ti fer en kontribisyon valab pandan ki ou pei ti bezwen ou.

Me ler ou esey fer sabotaz, pou kree fristrasyon e pou retard progre pei zis pou *score* bann pwen politik nou tou nou regrese. En mo ki Onorab Cosgrow i kontan servi.

E listwar pou mazin ou konman sa sitwayen ki ti'n kapab fer en diferans a en moman kot ou pei ti bezwen ou, me ki ou ti swazir pou fer otreman. E sa bann *MNA US* dan sa setyem Lasanble se egzaktaman koumsa ki zot pou ganny mazine. Bann profet negativite, Mr Speaker.

**(APPLAUSE)**

**HON PHILIP MONTHY**

Zis pran legzanp Mosyon ki nou pe diskite. Onorab William in vin avek en tre bon Mosyon pou rekonnèt zefor e devosyon ki tou travayer Seselwa in mete pou ki Sesel i la kot i ete ozordi. E ki nou'n vwar? Olye sezi sa loportinite pou siport sa Mosyon, nou vwar en manev malisyè pou esey *highjack* en tre bon Mosyon atraver en nespes lamannman negativ.

Onorab Vidot in koz lo malonnet Mr Speaker, pou mon se sa ki apel malonnet. Ler ou esey *highjack* Mosyon ou kanmarad kot ou, ou ti'n kapab soumet ou prop Mosyon e fer krwar ou pli konnen, sa ki apel malonnet!

Malonnet i osi en pe parey sa ki zot in fer avek ansyen Prezidan Faure. Ou fer krwar ou siport li pou ogmant laz retret, apre ou vin la anndan ler

pou pas Lalwa ou dir sa pa en bon desizyon ditou.

**(APPLAUSE)**

**HON PHILIP MONTHY**

Mr Speaker, atraver ou, Onorab Cosgrow in demann nou pou swazir ki pozisyon nou oule pran anver travayer Sekter Piblik. I dir ennler nou kritik zot, ennler nou felisit zot.

Mwan la mon pozisyon Onorab Cosgrow atraver ou Mr Speaker, i annan en tre gran group travayer Sekter Piblik ki pe fer en travay ekselan. E pou sa mon felisit zot. Me i annan en group ki pe les zot ganny enfliyanse par sa parti ki apel *US* pou fer sabotaz.

Ler ou fini koz avek en manm piblik ki pe *call* ou pou ganny en servis e ou zoure kan ou pa ankor fini koup telefonn, e sa dimoun i tann ou. Mon *sorry* Mr Speaker. Sa bann tel travayer pou mwan zot pa devret dan servis piblik.

Ler en zofisye lapolis i donn en tiket en manm piblik apre i dir li "al tik anler", pou mwan en tel endividi pa sipoze pe servi dan nou lafors lapolis.

Ler dan bann biro fo lenformasyon i ganny donner avek manm piblik, zis pou konfiz zot e fer zot fristre e ankoler kont sa Gouvernman,

bann tel endividi pa devret dan bann tel *post* Mr Speaker.

E mon annan en mesaz pou bann travayer Seselwa ki siport parti *US*. Ler ou asize dan kongre ou parti e ou bann dirizan i demann ou pou vin fer politik dan louvraz ou devret dir zot non. Ou devret dir zot, mon siport zot wi, me mon annan en konsyans konman en imen e sa ki ou pe demann mon pou fer *sorry* mon pa pou fer.

**(APPLAUSE)**

**HON PHILIP MONTHY**

Mr Speaker, in ganny dir ki plizyer dimoun in dir zot anvi vin partisip dan politik, selman zot per pou vin devan pangar zot a ganny viktimize.

Mr Speaker, nou'n riye la anndan ler Onorab Cosgrow in dir sa. Me mwan mon konnen ki mazorite travayer Sekter Piblik oubyen menm Prive ki zot osi zot in riye. Nou tou ki ti siport Lopoziyon sa letan nou konnen ki mannyer ti ete sa lepok anba ansyen sistenm.

Mon an 2016, mon ti en *staff* kot Lakademi Touris *STA*. Mon ti ganny kriye apre ki mon ti al atann en *rally* *LDS* Roche Caiman, dan biro dan prezans *Chairman Board STA* sa letan. Dan prezans *Principal* sa letan. Onorab Aglae ou bezwen konn

li en zabitan ou distrik. E mon ti ganny reprimande konmkwa mon'n ganny vwar dan *rally* e ki fodre mon aret ale.

Ou konnen lekel ki ti o pouvwar sa letan? Prezidan Danny Faure. Ou konnen ki mon ti dir Mr Speaker? Mon ti dir zot mon pou kontinyen siport mon parti, ziska ler nou ariv o pouvwar. Ki mon ti ganny demande? *Ok* si ou al *rally* selman pa met triko. Tousala ti pase sa. Mon ti dir zot non. Mon lib pou met okenn triko ki mwan mon anvi a okenn moman ki mon oule.

Onorab Lemiel Mr Speaker, demande si vreman i annan sikse dan sa pei - bokou dimoun pe dir si mon ti konnen. Selman Onorab Cosgrow i dir si pei pe fer byen se pa aköz *LDS* se travayer Seselwa. Me savedir i annan sikse ki pe arive dan sa pei?

**(APPLAUSE)**

**HON PHILIP MONTHY**

I dir pa vwar nanryen ki pe arive. Selman apre i vin akiz nou konmkwa nou pe reklanm sikse ki zot Gouvernman in fer! E Mr Speaker, konfizyon total! Ler ou pe sey konfiz lepep finalman ou konfiz ou prop lekor.

Mr Speaker, mon pou felisit tou sa bann travayer ki parey mwan nou ti travay anba en sistenm, ki si zot ti konnen ki ou siporte ou ti pou ganny pouse. Mon annan en ser ki travay *IDC* i ava pe ekout mon la ozordi, menm apre ki nou ti ranport eleksyon i ti ankor per pou li vin *rally LDS*. Pangar i ganny pouse dan son travay. Koumsa ti ete anba sa ansyen sistenm. Anba sa Gouvernman *LDS* pa egziste sa.

Mon pou felisit tou sa bann ki'n vwar politik pe deroule dan travay, me ou pa ti kapab dir nanryen me sibir, akoz ou ti bezwen met en lasyet manze lo latab pou sonny ou zanfan. Ou ti parey en sitwayen dezyenm klas dan ou prop pei. E mon asire ki sa pep pa pou zanmen swazir pou retourn ankor dan sa bann peryod nwanr nou listwar Mr Speaker.

Ozordi ou annan travayer o plase dan Sekter Piblik ki lo Komite Egzekitiv Parti *US*. Mr Speaker, anba sa parti ki listwar pou ziz li konman sa parti ki opres plis son pep, kote ou ti pou vwar sa?

Ozordi zot oule vin fer ou krwar i annan viktimizasyon politik dan travay. Kot sa Minister ki apel Gouvernman Lokal kote ou ti pou vwar

travayer ki ti siport *Lopozisyon* sa letan Mr Speaker?

Ozordi ler mon get sa Minister mon vwar mazorite siporter *US* Mr Speaker. Dan bann lezot Minister ankor parey.

Mr Speaker, mon pou felisit Onorab William pou vin ek en tel Mosyon. Si *US* zot zanmen zot in annan sa bonn volonte pou vin avek en Mosyon dan sa Lasanble pou felisit travayer Seselwa, Onorab William li in vin avek.

Prezan blanm zot prop lekor si ler zot ti annan loportinite, pou montre travayer Seselwa ki zot apresye zot zefor me zot pa'n fer li, me pa vin tir zot lakoler lo nou. Akoz nou, nou deside fer sa atraver sa Mosyon.

Avek sa detrwa mo Mr Speaker, mon pou asir mon sipor Mosyon anmennen par Onorab William e mon pou asir mon sipor pou tou travayer Seselwa ki pe travay dir e ki zot konsyans i prop pou louvraz ki zot pe fer pou sa pei e mon enplor zot pou kontinyen sa bon travay, pou bouz sa pei de lavan Mr Speaker. Mersi.

**(APPLAUSE)**

**MR SPEAKER**



Mersi Onorab mon ava prezan apel loter Mosyon Onorab William pou fer son repons lo deba e konklizyon. Onorab William?

### **HON WAVEN WILLIAM**

Mersi Mr Speaker. Mr Speaker, mon pou konmanse par re lir sa Mosyon ki pep deor zot konpran egzaktman ki ti lentansyon bann mo enportan dan sa Mosyon ki mon ti pe met lanfaz lo la.

Mr Speaker Mosyon i lir *comme* swivan; Lasanble i felisit tou travayer dan Sekter Piblik e Prive pou zot solidarite, travay dir e perseverans akote Gouvernman pou sa sikse ki pei in fer dan sa kourt dele letan depi dernyen eleksyon.

Mr Speaker, nou *motto* konman sa setyenm Lasanble se 'deservi en demokrasi modern'. I malere ki dan nou Lasanble nou annan en Lopozisyon ki ankor priy dan lepase ek politik parti inik ki ozordi zot pas zot letan zis distort lenformasyon realite e an deor konteks.

Mr Speaker, mon pe dir baze lo bann larepons ki nou'n ganyen lo sa Mosyon. En stratezi ki ti ganny servi dan lepase ki pou kasyet dimoun vre realite devlopman ki pe pase, sirtou pou en gran

mazorite pep Seselwa ki pa ti pe konnen ki pe pase enternasyonanman, alor zot ti zwe lo linyorans sa pep.

Mr Speaker, Mosyon ti pe montre ki sa Lasanble i rekonnèt zefor solidarite, travay dir e perseverans ansanm ek Gouvernman, pou dan sa kourt dele letan pou permet lekonomi vin pli rezilyan Mr Speaker.

Mr Speaker, pou met keksoz dan konteks, Sesel pa ti fer fas ek pandemik *COVID* dan sa 43an me sete an 2020 ki ti ravaz Sesel e pran lavi avan ler plizyer nou bann manm fanmir zanmi e vwazen.

Mr Speaker, menm si serten Manm pe dir ki sete Prezidan ki'n touy dimoun ek *COVID*, Mr Speaker e se sa menm propagann parmi plizyer ki zot bann aktivis pe dir bann dimoun dan distrik ki pov an lespri. Bann ki pa pans pou zot menm me les lezot ganny servi Mr Speaker.

Mr Speaker, sa pa vre senm lagrenn bat latet sa Mr Speaker?

Olye zwenn ek nou kote pou ankouraz travayer pou kontinyen reste angaze; olye felisit travayer pandan sa kourt dele letan apre eleksyon pou solider travay dir e persevere, ki byento zot pe al rekolte fri merite sa ki zot in senmen dan

2an edmi, prenan kont Mr Speaker, kot nou ti ete an 2020.

Mr Speaker, atraver ou eski Onorab Vidot pe dir Seselwa ki sa enn lagrenn ti en lagrenn bat latet? Mr Speaker pou retir e aret labi kot i annan, ankouraz e motiv travayer Seselwa pou travay, ankouraz bann kot lakour ki kapab al travay pou pran en lanplwa pou ed zot fanmir, eski se sa bat latet Mr Speaker?

Mr Speaker, a sa pwen mon oule felisit ou pou ou *être* o fe ki *Standing Order* Lasanble.

Mr Speaker, sa menm *Standing Order* ki Parti Lepep e *A New United Seychelles* in kit ek setyenm Lasanble, pou anpes sa Mosyon.

I malere Mr Speaker, i malere ki zot menm ler zot ti o pouwar zot ti'n kree sa gid pou refri. La zot oule pran soufflet e fer refri taye.

Mr Speaker, lot kote pe dir ki se zot ki'n annan pep Seselwa aker. Ki se zot ki i annan en zentere sa pep aker, kan zot aksyon depi ler zot in antre dan Lopozisyon zot in zis *boycott*, opoze, fann propagann dan distrik atraver zot bann aktivis. Senm lafreyer dan pep, distort lenformasyon dan Lasanble, *walk out* e konplent Mr Speaker.

Ki zot konplent Mr Speaker? Akoz douler eleksyon perdi an 2020. I fermal Mr Speaker pou zot, mon konpran.

En laverite Mr Speaker, ki mon pou dir se ki depi Gouvernman *LDS* in vin o pouwar, zanmen mon'n ganny en *call* sorti *State House*, sorti kot Prezidan ouswa son bann zofisyé pou demann mwan en tel ki dan ou distrik ki travay dan en tel Minister, ki i siporte? Zanmen mon'n ganny sa *call* Mr Speaker.

Laverite se ki anba lepok *SPUP*, *SPPF*, Parti Lepep e *United Seychelles* mon ti ganny *call* Mr Speaker, pou donn serten lopinyon lo serten bann dimoun. Mr Speaker, i regrete ki mon'n bezwen fer li sa lepok, me sa i en fe Mr Speaker ki lot kote latab zot pa pou kapab zanmen *deny*.

**(APPLAUSE)**

### **HON WAVEN WILLIAM**

Mr Speaker, mon pa pou anbaras zot plis. Serten pe dir ki Mosyon pe vin fer domaz *damage control* diskour Leta Lanasyon Mr Speaker. San vremen konpran ki soulaze bokou fanmir in ankouraze, pou antann Prezidan pe koz lo bann malez ki pe ronz nou sosyete. Sa nesesite pou

travay, kontribye kot lakour, servis piblik pa fer pep fristre me donn en bon servis. Serten Manm pe demande aköz felisit travayer a sa moman Mr Speaker? I menm dir li menm ki wi mon osi felisit travayer. I dir ki ozordi travayer pe fer fas ek bokou defi dan servis piblik Mr Speaker.

Mr Speaker, konmsi sa bann problemn Gouvernman LDS pa'n erite ek zot swadizan gran plan annan Seselwa aker. Me solman fer pep krwar ki bann ki pa anvi travay, ki kapab pa travay e ki Gouvernman pou donn li tou keksoz, menm parey ki sa travayer ki pe solider travay dir e pe persevere. Mr Speaker nou pa kapab aksepte a bann keksoz.

**(APPLAUSE)**

**HON WAVEN WILLIAM**

Serten i demande si travayer pa ti pe travay avan 2020?

Mr Speaker, sa Onorab in oubliye ki mannyer COVID in tap zil Praslin e La Digue plis ki Mahe, baze lo zot groser e depandans lo Sekter Tourizm. Sa menm Onorab in vin konplent dan sa Lasanble.

Mr Speaker, si Onorab pe viv Sesel, i a onnet e rekonnet ki travayer Seselwa konman en

anplwayer e anplwaye, in travay pandan sa kourt dele letan 2an edmi e ki zot merit ganny felisite pou zot performans ekselan, dan dele letan ki Mosyon pe fer referans avek.

Serten Onorab i dir ki Mosyon pe kree divizyon dan pei. Mosyon pa senser. Zot problemn se ek sa bout ki konsern Gouvernman Mr Speaker. I domaz ki zot pa kontan sa Gouvernman.

I dir ki mon pe servi ledo travayer pou glorifye Gouvernman. Sa ki mon'n antann repete dan Lopozisyon lo sa Mosyon Mr Speaker, se lenvitasyon pou dir siporter desann Praslin pou al *rally* le 30 Avril.

**(APPLAUSE)**

**HON WAVEN WILLIAM**

Mr Speaker, mon pou dakor avek ou, ki si nou anvi en Lasanble serye tou le de kote bezwen demontre.

Mr Speaker, mon dedikasyon se ki Lopozisyon pe servi ledo sa Mosyon, grenp pli o pou fer lavertisman zot *rally* Praslin. La zot serye menm la Mr Speaker!

Mr Speaker, fodre pa ki lot kote latab zot krwar ki anba SPUP, SPPF, Parti Lepep e *United Seychelles* ki larzan

*taxpayer* ti zot larzan! Ki sa larzan ti sorti dan zot kont personnell! I larzan pep Seselwa!

Alor fer atansyon letan zot pe koze konmsi devlopman Sesel in ganny fer ek zot larzan parti politik. Arete silvouple! I fer mwan mazine ki enn zot aktivis ti dir ek enn son zanmi, “be la ki *US* in perdi eleksyon, Mr Faure pou al ek tou son larzan. Ki *LDS* pou fer?” Akoz in al ek tou son larzan Mr Speaker.

Mr Speaker, i montre ou ki fason ki dan *United Seychelles* i servi bann ki pli feb, pou senm fo propagann e koz mansonz.

En lot *comme d’habitude* Mr Speaker, in zis anmenn en ladyare parol ki finalman nanryen konkret pa’n sorti kot li, akoz fodre felisit e remerisi travayer Seselwa pou zot solidarite, travay dir, e perseverans a kote Gouvernman pou sa reisit dan kourt dele letan Mr Speaker.

Mr Speaker, Mosyon i kler, menm si *SBC*, ouswa atraver en fot ouswa atraver azanda personnell politik serten endividi, dan Nouvel yer swar, ouswa par neglizans zot pa’n *cross check* pou donn vre nouvel lo ki Mosyon pe pase dan Lasanble Mr Speaker. I regretab.

Mr Speaker, parey en nenport travayer en Manm Elekte ki konnen ki pa pase atraver lemonn. Sa ki pe arive Sesel, apresye bann komanter ki bann tel lorganizasyon parey *IMF*, *World Bank*, e *OECD* pe dir apropro Sesel. Son relansman dan sa kourt dele letan pou sikse in fer i enkrwayab!

Mr Speaker sa pa mwan ki dir, me se sa bann eksper laba dan sa bann lorganizasyon enternasyonal.

Mr Speaker, koman sa brans Lezislatif ki’n siport bann mezir ki pa ti popiler, konn son lenpak kourt term lo fanmir Seselwa, me konpran son lefe sekirite ekonomik Sesel, lonterm pou benefisye Lepep Seselwa, Mr Speaker i nou devwar rekonnnet sa travay ekstra dir pandan sa kourt dele letan, pou sirmont bann defi pou ozordi kapab donn en logmantasyon 10poursan. Mr Speaker, oli problenm?

Olye rekonnnet, Lopozisyon pe mazin zis ganny pouvwar an 2025. Ki demontre an traver sa plato ki nou erite pouvwar zot vizyon kourt term lepase, fer keksoz zis pou retenir pouvwar dan 5an menm. Atraver mansonz, fo propagann ki lekonomi ti *ok* zis pou reganny eleksyon Mr Speaker.

Wi Onorab pep Seselwa in nepli dormi boner. Seselwa i pli vizilan lo ki pe pase dan son pei ozordi. Zis pa kriy ipipip avan zot ver i plen! Les travayer pep Seselwa kriy ipipip aköz zot vwar zot ver pe komans plen Mr Speaker.

**(APPLAUSE)**

**HON WAVEN WILLIAM**

Mr Speaker e en Manm pou bezwen remerisi en travayer Seselwa dan dernyen eleksyon pou debout. Mr Speaker lot kote latab i annan en Manm pou bezwen remerisye en fran travayer Seselwa dan dernyen eleksyon, pou debout, tir detrwa vot dan kote *LDS* pou li kapab dan sa Lasanble ozordi.

Sa travayer Mr Speaker se Mr Ralph Volcere. Sa Onorab i bezwen donn sa travayer en kado Mr Speaker, pou sa travay dir.

**(APPLAUSE)**

*(laughter)*

**HON WAVEN WILLIAM**

Mr Speaker, avan terminen mon ti ava kontan sezi sa lokazyon pou ofer mon kondoleans avek fanmir Joseph Grand Anse Mahe, Savy Estate ki'n perdi zot madanm, manman, zot ser.

Mr Speaker, mon pe dir sa aköz dan sa fanmir i annan en bann travayer Mr Joseph e son garson Jude, ki ozordi Mr Speaker zot pe ganny rode partou pou ofer zot servis. E ozordi mon le profit sa lokazyon pou felisit zot menm dan sa moman douloure.

Mr Speaker mon le sezi osi sa lokazyon pou osi pas mon kondoleans avek fanmir Joseph e Louise La Misère ki li osi resaman in perdi enn zot papa, zot msye, zot zanmi dan kominote La Misère.

Mr Speaker, avek sa de mo, mon krwar Lasanble Nasyonal, setyenm Lasanble atraver lo kote *LDS*, nou annan rezon, nou annan tou rezon Mr Speaker ozordi pou felisit tou travayer Seselwa, koman anplwayer, koman anplwaye ki'n vremen solider, travay dir, persevere ki ozordi Mr Speaker, nou'n ariv lo la nivo ki nou'n arive. Ki lezot pei deor i zalou nou e pe koz lo nou. Mersi.

**(APPLAUSE)**

**MR SPEAKER**

Mersi. Mersi mon ava apel bann Manm pou vot lo sa Mosyon silvouple. Manm ki an faver lev lanmen? Byen, Manm ki kont?

Lo Mosyon ki devan Lasanble, 18 Manm in vot pour,

8 Manm in vot kont, e zero in *abstain*. Alor sa Mosyon in aprouve par Lasanble.

**(APPLAUSE)**

**MR SPEAKER**

Nou ava pran en poz la e Lasanble i kapab rebran 11.35.

**(BREAK)**

*(Mr Deputy Speaker in the Chair)*

**MR DEPUTY SPEAKER**

Bonzour tou Manm Onorab. Bann *staff* Lasanble Nasyonal e piblik ki pe swiv nou travay pou sa Merkredi. Nou pou kontinyen avek nou *Order Paper* e prosennman nou annan en Mosyon table par Manm Elekte pou distrik Grand Anse Mahe.

Avan sa mon vwar lanmen Onorab Loze?

**HON JOHAN LOZE**

Mersi Mr Speaker. Mr Speaker mon ti annan zis en *brief point of order*. Mon le met lo rikord *that we had a friendly discussion during the break*. E ou ti dir mwan ou *agree to disagree* avek mwan lo sa *matter* ki ou ti *raise earlier*, unless mon soumet *verbatim* a ou latansyon.

Mon le dir ou ki mon annan *verbatim* la dan mon lanmen, mon pare pou soumet dat ki Onorab Ramkalawan ti fer sa *speech was Friday 21<sup>st</sup> December, 2007*.

*Honourable* Wavel Ramkalawan *LOTO, reply on Constitutional Appointees Emoluments (Amendment) Bill, 2007*. E lo dezyenm paz nou vwar sa *statement* kot i dir “mon ava dir avek zot ki parfwa letan ou fer refleksyon ou dir gran mersi mon'n perdi, parski lanmans pwalon i so”.

Sa ki mon, *I beg to submit to your attention* Mr Speaker. *And on a final note*, 🎵 ler Loze i koze tande 🎵.

**MR DEPUTY SPEAKER**

Mersi Onorab pou sa, mersi pou sa klarifikasyon akoz Lasanble wi nou bezwen *rely* lo *verbatim*, vremen ki etabli bann fe lo keksoz ki nou dir, e alor nou ava aksepte sa *verbatim* ki ou'n prodwir.

Wi parey mon ti pe dir se Manm elekte pou distrik Grand Anse Mahe ki annan en prosen Mosyon. Donk mon ava envit Onorab pou prezant son Mosyon, en Manm ava segonde avan ki nou la lo lentrodiksyon Mosyon. Onorab William.

**HON WAVEN WILLIAM**

Mr Speaker Mersi. Mr Speaker Mosyon i lir *comme* swivan; Prenon kont sityasyon sanzman klima e son lefe domaz globalman, Lasanble i demann Gouvernman pou fer tou sa ki neseler pou ekip Lazans Meteo avek lekipman neseler pou resevwar lenformasyon pou previzyon *early warning* pli presi. Mr Speaker *I beg to move*.

### **MR DEPUTY SPEAKER**

Mersi Onorab. E mon vwar Onorab Michel Roucou.?

### **HON MICHEL ROUCOU**

Bonzour Mr Speaker. Mr Speaker Mosyon i ganny segonde.

### **MR DEPUTY SPEAKER**

Mosyon i ganny segonde. Mersi. Donk aprezan mon ava envit loter Mosyon pou entrodwir son Mosyon avek Lasanble Nasyonal silvouple, Onorab William.

### **HON WAVEN WILLIAM**

Mersi Mr Speaker. Mr Speaker mon le dir ki mon'n ganny enspire pou anmenn sa Mosyon, baze lo plizyer keksoz e leksperyans atraver travay Lasanble. Enn se nou bann enteraksyon enternasyonalman dan bann *forum*. E osi an relasyon avek sa ki pe arive

avek sa size sanzman klima dan nou pti pei Sesel.

Mr Speaker, detrwa mwan pase lo *SBC*, mon ti antann Mr Vincent Amelie kot, ki ansarz kot Lazans Meteo letan i ti pe koze. Zot ti pe siny en lakor avek *Cable & Wireless* pou kapab si i annan okenn bann mon kapab dir tanpet, ki sa *early warning system* Seselwa e dimoun ki viv Sesel zot kapab ganny sa bann mesaz lo zot *WhatsApp* vizavi *early warning*.

Ki mon krwar i en bon keksoz e mon ti ava demande ki Lazans Meteo osi zot konsider siny menm lakor avek bann lezot Lazans Telekomunikasyon isi Sesel.

Me Mr Speaker, *back to Motion*. Mr Melanie ti osi dir ki i annan serten lekipman ki zot bezwen aköz deplizanpli sityasyon avek sanzman klima, dega ki pe ganny fer, i pe vin pli pir. E kalite lekipman ki zot annan pa pe permet zot kapab donn lenformasyon piblik, bann lenformasyon ki enn a ler, a tan, pli kler e pli presi. E i ti koz lo en serten lekipman ki apel en *Doppler radar equipment*.

Mr Speaker, sa lekipman i ti dir ki i kapab donn lenformasyon lo ki kantite delo ki kapab annan dan nyaz a en

serten moman. Sirtou dan bann moman tanpet.

Kot si sa i kapab kre dega e bokou domaz, ki sitwayen e Gouvernman i kapab reazir dan en fason pli presi, pou kapab evit bann domaz ki kapab ganny kree dan pei vizavi nou bann devlopman sosyoekonomik e progre ki nou'n fer.

Mr Speaker, alor lo sa baz mon santi poudir Lasanble Nasyonal koman sa brans Lezislatif, i bezwen aport son sipor ki Sesel nou Lazans Meteo i kapab ganny ekipe avek enn sa masin.

Mr Speaker i en masin, en lekipman ki kout vremen ser. E mon konnen ki i annan enn ki nou ti'n ganny prete e nou bezwen rann. E alor i annan sa nesese Mr Speaker, pou Sesel kapab fer tou fason - parey mon'n dir dan Mosyon, demann Gouvernman pou fer tou sa ki nesese Mr Speaker pou kapab ganny enn sa masin, ki nou ava ganny bann lenformasyon "early warning" pli prese.

Mr Speaker, tou bann Manm isi dan sa Lasanble e piblik an zeneral ki get Nouvel, nou vwar atraver lemonn sa fenomenn sanzman klima ki fason i pe afekte plizyer pei. E pe afekte bann pei dan en fason vremen brital. E dan diskisyon

ou vwar poudir be si zot ti annan bann lekipman nesese pou kapab annan sertan bann prediksyon, i ti ava ed sa bann diferan Gouvernman enkli Gouvernman Sesel pou kapab reazir dan en fason pli presi.

So Mr Speaker, avek sa de pwen mon pa pou fer mon prezantasyon tro long aköz sa ki mon'n dir e atraver Mosyon i tre kler. E nou tou ki konsyan ki pe arive atraver lemonn vizavi sa fenomenn. Mon krwar poudir nou Lasanble nou devret aport nou sipor ki Gouvernman i fer tou sa ki nesese ki Lazans Meteo i ganny zot sa masin. Sa lekipman.

Mr Speaker, mon'n ganny en rankont personnel avek Mr Vincent Amelie isi kot Lasanble, mon vwar poudir sa zennonm i vremen pasyonnen avek sa size. E li menm li in dir mon poudir wi, sa lekipman i tre nesese, e Sesel fodre i ganny enn sa lekipman dan lavenir.

Mr Speaker avek sa de pti mon, mon ti a kontan *move* ki sa Mosyon i ganny laprouvasyon Lasanble. Mersi.

**(APPLAUSE)**

**MR DEPUTY SPEAKER**

Mersi Onorab. Manm ki ti segonn Mosyon se Onorab Roucou, ou le entervenir la?



**HON MICHEL ROUCOU**

Mersi Mr Speaker. Mon a dir bonzour tou mon bann koleg Onorab, e bonzour spesyal zabitan Mont Fleuri. Mr Speaker, si ou permet mwan avan mon kontinyen lo mon diskour, mon anvi anvoy en meyer swe pour Mr Willy Theresine. En zabitan Foret Noire, ki li an se moman la i dimoun pli aze dan mon distrik, e ozordi i pe swet son 99enm laniverser. Nou swet li tou le bon, e ki Bondye i kontinyen beni li.

**(APPLAUSE)**

**HON MICHEL ROUCOU**

Mr Speaker, annefe mon'n pran laparol lo Mosyon anmennen par Onorab William, akoz mon distrik pa bokou letan pase, ti ganny tape avek en - ou kapab dir - avek en *flooding* ki ti arive. Ki sa nou ti vwar poudir se ki kot bokou fanmir ti ganny afekte li menm li.

E parey Onorab William in dir, oparavan bokou bann fenomenn ki ti ganny arive, nou ti vwar li lo televizyon. E, an 2004 nou ti vwar poudir Sesel li menm li i ti ganny en *wakeup call*, kot nou ti vwar kot nou ti ganny tape avek en *tsunami* ki

premye fwa ki ti arive dan nou listwar pou nou.

Kot sa aprezan, kot nou ti vwar poudir se ki Sesel ti bezwen konmans vwar li pe angaze, pe partisipe pou koz lo *climate change* li menm li, sanzman klima. E kot nou'n vwar poudir plizyer fwa dan bann deba, dan bann lezot pei, Sesel pe ganny reprezante pou nou kapab fer tande nou lavwa li menm li.

Mr Speaker, e en lot keksoz ankor, mon ti ganny sans pou mon reprezant Lasanble *CPA London*, kot laba nou'n zwenn avek plizyer lezot Manm bann larestan Lasanble. E en keksoz ki ti tous mwan, ti annan en Speaker ki sorti dan enn bann Pti Leta Zil, ki mon ti annan en dyalog avek li. I ti dir mwan poudir se ki li kot zot reste, se ki i lo en pti zil kot zot vwar poudir ek letan zot pou bezwen pran zot en desizyon.

Swa zot pou bezwen al imigre dan en lot pei, ouswa zot pou bezwen zot Gouvernman li menm li, zot pou bezwen pran en desizyon pou zot konmans fer bann *rock armoring* pou gete ki mannyer i kapab ede. Akoz kot son lakaz i ete i pa tro lwen ek lanmer. E zour, a zour i vwar poudir se ki pli ale delo sale li menm li pe apros avek son

lakaz. Ki sa i ti fer mon mazin en pti pe nou pei li menm li.

Nou vwar poudir se ki avek sanzman klima la ki pe arive, Sesel nou, nou pa pe ganny eparye. Ek sa lensidan li menm li ki ti arive dan mon distrik, sa osi tou i fer ou mazin en pti pe pli lwen. E bokou nou ler nou pe pase dan semen, nou kapab get lo Montanny Trwa Frer, nou kapab war sa gran mark, annefe ki apre sa lensidan in ganny kite, ki ozordi pou nou i ankor en fenomenn kot bokou dimoun i ankor pe demann keston - ki'n arive? Kote sa kantite delo i sorti li menm li?

E kwa ki ti kapab ede pou anmenn prevansyon ki pa ti a kapab ariv petet bann pli gro dezaz ki bokou fanmir in perdi zot bann keksoz en pti pe personnel pou zot. E mwan, mon krwar poudir se ki, si i arive demen kot Lazans Meteo - vremen - mon konnen poudir zot pe fer vremen bokou. Nou remersi zot pou sa travay ki zot pe fer. E tanzantan nou vwar zot, zot pe mont lo televizyon pou edik Lepep Seselwa lo kote sanzman klima.

E mwan, mon panse se ki, si zot ganny sa bann lekipman parey Onorab William in dir oparavan, petet sa i a kapab ed nou en pti pe plis. E ki dan le

fitir nou a kapab konnen, e Seselwa ava pli prepar zot ki ler demen nou konnen poudir la kantite *volume* delo ki pou arive, e kwa ki kapab ganny fer li menm li.

E mon distrik, Mr Speaker. Mon'n ganny dir poudir se ki larivyer Rochon ki i tonm an 3 distrik - Plaisance ki separ... Larivyer Rochon i separ Mont Fleuri ansanm avek Plaisance. E osi i annan distrik Bel Air ki sa i pran son konmansman. E sa kantite delo ki sa larivyer i gannye li menm li, atraver lapli ki sorti lo montanny. E sa ti a kapab petet pou ede pou nou kapab ed meteo pou zot kapab estimen, e konnen kantite *volume* delo ki lapli pou anmennen.

E sanzman klima, nou vwar poudir konmela bann letan ki oparavan, bann letan lapli keksoz in sanze. Konmela lapli i kapab vin bann letan ki ou pa pe ekspekte. E parey ou konnen poudir se ki nou imen, nou pa kapab zis vini e predir serten keksoz ki apre demen ek letan nou vwar i sanze.

E mwan, mon krwar poudir se ki, i devret annan bokou plis ki kapab ganny fer, swa atraver bann biznesmenn dan distrik, akoz dan pei li menm li... Akoz nou vwar parey Onorab William in dir, se ki sa

radar i kout vremen ser. Ki nou ti'n deza ganny prete enn ki aprezan nou pou bezwen rann.

E si nou Sesel nou kapab okipe avek enn sa, sa pou fasilite travay nou bann teknisyen ki travay laba kot meteo. E osi pou ed pei li menm li, ki demen nou a kapab prevnir dan bann letan avan kwa ki kapab arrive.

E mwan Mr Speaker, mon pa pou fer mon diskour tro long lo la. Parey Onorab William in dir. Se ki mon pou donn mon *full* sipor, akoz nou distrik li menm li in ganny afekte avek sa *flooding* ki ti arrive tou dernyerman. E petet sa i ava kapab ed lezot distrik, akoz mon'n ganny dir pou dir Cascade osi tou i annan en gran larivyer, ki sa petet demen si i annan okenn evantyalite ki ariv ankor, ki nou pa swete, ki sa i a kapab ed nou bann travayer e osi ed bann distrik ki demen sa i ava ede ki personn - ki pa ankor arrive - ki personn i ava perdi zot lavi. E Onorab William i kapab kont lo mwan pou mon kapab donn li mon sipor. Mersi.

### **MR DEPUTY SPEAKER**

Mersi Onorab Roucou. Aprezan mon pou envit Onorab Phillip Arissol pou pran laparol silvouple.

### **HON PHILLIP ARISSOL**

Mersi Mr Speaker. Bonn apre midi Mr Speaker, tou dimoun ki a lekout, e sirtou tou zabitan Anse Boileau. Mr Speaker, i enportan pou Gouvernman donn priyorite bann mezir pou adres sanzman klima e son lenpak. Envestir dan Lazans Meteoloji avek lekipman ki pou amelyor presizyon previzyon letan, avek bi ki sa lazans i kapab averti pei avek lenformasyon, ouswa previzyon pli boner posibil.

Previzyon meteoloji i vremen enportan pou prepar aksyon lo levennman movetan ki pe vin pli souvan e pli grav avek lenpak sanzman klima. Ler sa Lazans Meteoloji i donn lavertisman egzakt ki pou annan en movetan, pli boner posibil, sa lazans pe ed pei e lakominote pou prepare, kapab apez lenpak sa tel levennman. Sa i kapab sov lavi e redwir domaz lo bann propriyete e bann lenfrastruktir.

Gouvernman i kapab siport Lazans Meteoloji avek sifizaman resours e lekipman avek amelyorasyon dan teknolozi, envesti dan resers e devlopman pou amelyor lafason ki sa lazans i resevwar lenformasyon, ki ede dan en fason ki sa bann zofisye i lir letan.

Gouvernman i kapab kolabor avek lorganizasyon enternasyonal pou partaz lekspertiz e lenformasyon; travay ansanm pou devlop sistenm lavertisman pli efikas pou detekte danze relye avek sanzman klima, e ki previzyon boner i a kapab ede sov lavi.

Wi, previzyon egzakt ek boner i vremen enportan pou sov lavi e propriyete, sirtou dan ka movetan, tel ki gro divan, siklonn, linondasyon, bann sityasyon ki nou distrik Anse Boileau i souvan fer fas avek.

Mr Speaker, ler i annan lavertisman boner, popilasyon i kapab pli byen prepare e lo alert pou nenport ki evantyalite. Evakye landrwa ki a risk, ouswa pran prekosyon ki neser pou evakye si sityasyon i vin pli pir. Sa i diminyen tou risk aksidan.

An plis ki sa, lenformasyon egzakt e previzyon boner i kapab ed tou bann Lazans Sekour pou pli byen prepare pou asiste lo bann levennman dan en fason pli efikas, avek bi redwir domaz propriyete e lenfrastruktir. Sa a minimiz dega dan pei, e dan lakominote.

Alor, Mr Speaker, i enportan pou ki Gouvernman i investir dan Lazans Meteoloji avek lekipman pou amelyor

presizyon previzyon nou letan, pou alert piblik. An fezan sa, sa i a ede anpese, ouswa diminyen lenpak dezast ki lye avek sanzman klima. E an plis ki sa protez byennet e sekirite tou sitwayen.

Mr Speaker, pou redwir risk propriyete andomaze, e redwir risk perdi lavi atraver sanzman klima, nou tou nou bezwen adopte serten pratik. Menm ki Sesel pa prodwi bokou gas dan latmosfer, nou bezwen konsyan son lefe lo nou planet.

Alor i enportan ki annan aksyon o nivo endividi kominoter, e Gouvernman pour enn;- redwir diminasyon emisyon gaz latmosfer; adopte pratik ki rezistan kont lefe klimatik. Endividi e kominote i kapab pran mezir pou vin pli rezistan ek lenpak sanzman klimatik, tel ki, linondasyon. Sa i avek oter ki nou konstrir nou bann batiman, oter plato kiltivasyon lagrikiltir, avek gro divan, lafason ki nou konstri nou twatir batiman. Sa i zis 2 legzanp.

Parey Mosyon pe demande, amelyor sistenm avertisman boner, e kot Gouvernman i investi dan Lazans Meteoloji pou amelyor presizyon previzyon kot piblik a ganny lenformasyon pli vit, o pli vit ki posib.

Lavertisman lo sityasyon letan fodre i byen presi lo televizyon e lo radyo; devlop e enplimant plan pou aksyon vitman pour minimiz bann ka perdi lavi e propriyete dan sityasyon movetan.

Gouvernman i merit siport zefor adaptasyon tel ki konstriksyon miray pou retenir gro laroul, amelyor sistenm drenaz. Avek bann tel aksyon, nou kominote i kapab pli byen reziste lenpak sanzman klima, e osi redwir risk domaz propriyete. Mr Speaker, avek sa bann tel aksyon, nou pei, nou sitwayen pou dan en meyer sityasyon fas a sanzman klima. Mersi.

**(APPLAUSE)**

**MR SPEAKER**

Mersi Onorab Arissol. Mon pou aprezan envit Onorab Aglae pou pran laparol.

**HON EGBERT AGLAE**

Mersi Mr Speaker. Mr Speaker, Mosyon ki la devan nou pe adres en size presizeman en lorganizasyon ki obzerv letan, e osi donn prediksyon letan. Sa i servis meteoloji Sesel. E dabor mon felisit, e ankouraz tou sa bann profesyonnel ki pe travay dan sa lorganizasyon.

I annan ki bokou letan i la. E osi i annan ki'n kit nou, parey Mr Mondon ki'n kit nou. E nou bezwen kontinyen siport sa bann travayer profesyonnel dan sa kad, pou zot kapab kontinyen donn nou en servis previzyon letan, aköz bokou nou i depan lo la. E osi i en servis ki atase avek nou program sosyoekonomik, aköz i annan bokou endividi e biznes ki dan bann loperasyon - e ki mon a site taler - i depan lo en bon previzyon letan.

E Mr Speaker, Sesel ki nou osi nou form par Lorganizasyon Enternasyonal Meteoloji, e osi nou form parti bann konvansyon ki atase ek sa bann desizyon lorganizasyon. E nou osi en pei ki'n pas atraver bann kalamite letan, ki'n osi koz lanmor isi dan nou pei e in koz pa mal domaz.

E sa i fer nou rapel 2004 letan nou ti fer fas avek *tsunami*. E osi dan bann lannen byen avan, parey dan letan lavalas, bann kalamite ki'n pase. Solman tou resaman, set an lannen 2000 ki nou fer fas ek en *tsunami*.

E sa bann levennman parey in touzour vin en *ring bell* mon kapab dir. En laklos in sonnen pou tou bann pei mondyal, pou rod bann meyer fason pou zot kapab detekte

byen an avan bann formilasyon letan ki kapab poz danze pou okenn pei ouswa okenn rezyon.

E mon'n fer en pti resers ki letan an 1952, letan lorganizasyon anba *UNESCO* sa letan, sa i *IOC*, *Intergovernmental Oceanographic Commission*. Zot ti zwenn ansanm pou zot travay lo en metod, ou kapab dir, pou kapab detekte bann *early warning of tsunami*. E kot osi zot kapab pas lenformasyon ase vitman pou kapab anpese ki sa gravite domaz i tap sa bann pei, akoz plizyer lavi ti perdi.

E sete an prezizeman sa *warning* sistenm *tsunami* ti pou rezyon *Pacific*. Be apre ki nou, nou ti ganny tape dan nou rezyon, sa menm lorganizasyon ti zwenn ansanm pou vwar ki mannyer nou kapab *setup* enn ki pou dan nou rezyon. Akoz sa ki...

Lenformasyon ki ti annan la sete ki, letan *tsunami* ti pe tap nou, ti annan bann serten pwisan ki ti annan bann lenformasyon. Be vi ki zot ti napa bann relasyon ouswa bann Lagreman, bann *MOU* parey nou dir, pou partaz sa bann lenformasyon avek sa bann pei, i fer li difisil pou kapab donn sa bann *warning system*.

So, pou mwan, nou bezwen get keksoz dan en fason pli global. Mon pa get zis dan konteks Sesel, me selman nou bezwen get li dan en fason global, akoz, wi nou kapab annan pli bon lekipman, akoz nou bezwen. Me selman nou bezwen travay an partenarya osi avek bann lezot pei. Sirtou bann pei larezyon. E osi bann lorganizasyon ki ganny siporte, ankadre anba sa bann reglemantasyon kot i konsern meteo.

Mon dir sa Mr Speaker, akoz nou tousel nou konman en Pti Leta Zil ek en resours ki ase vremen limite, e nou annan nou en *vast* losean, ki fer osi ki nou annan en *vast* kot i konsern dan ler osi. En *zone* aeryen ki vremen *vast*.

I enportan ki nou pa koz zis previzyon pou Mahe la nou. Nou bezwen koz previzyon pou sa 115 zil osi ki egziste, akoz i annan bann aktivite ekonomik ki kapab ganny afekte. I annan *livelihoods* dimoun ki reste lo sa bann zil osi ki ganny afekte.

So, se sa ki mwan, mon get li dan en fason elarzi ki Gouvernman i bezwen annan li en plan en pti pe pli etale pou kouver sa rezyon, byensir pa son tousel. I pa pou kapab li tousel. I bezwen annan

afilyasyon avek sa bann lorganizasyon, ouswa bann pei.

Parey dan letan piratri, nou ti zwenn avek bann diferan akter lafors ki sirvey nou losean, pou donn en koudmen lo ki mannyer pou met en plandaksyon, e osi siperviz nou *zone* eksklizif.

So, pou mwan mon pe get li i bezwen vin dan sa kalite fason, pou nou kapab reisi dir, vwala nou'n *setup* en sistenm ki avanse, en sistenm ki kapab detekte boner, e en sistenm ki kouver nou *zone* eksklizif. Ki okenn nou bann aki dan nou ziridiksyon pa ganny afekte, ouswa i ganny proteze avek bann *early warning* ki kapab ganny anvoye atraver en sistenm ki byen ankadre. So, sa i enportan pou nou kapab akonpli konman en Pti Leta Zil.

Lot kote Mr Speaker, i annan en laspe, parey mon'n dir, sosyoekonomik, sosyal. Akoz sa i enportan pou nou pran kont se, nou en pei ki depan en kantite lo *tourism*, *ok?* E en servis meteoloji atraver son lanons ki pou nou i fer tou le swar, e apre i repete dan bomaten, in vin enn parti nou lavi kot avan nou sorti dan nou lakaz, nou sot deor, nou anvi konnen, be ki letan demen? Ki kalite letan nou ekspekte?

Menm parey pou en travayer ki depan lo servis meteoloji, parey peser, i anvi konnen mannyer letan, mannyer lanmer pou ete, akoz kot i pe ale i pe al lwen. I pa konnen ki i kapab rankontre dan semen si i annan movetan. E si previzyon in presi, e la zot kapab manev lo ki larout ki zot pou ale, ki bor ki pli bon, ki *calm*. Sa i pou bann peser.

Nou osi annan nou bann planter osi ki depan lo letan, akoz nou konnen poudir bokou prodiksyon i par sezon osi. I annan sezon ki bon. I annan sezon lapli ki pa bon pou zot. Tousala, e nou pe vwar ek sanzman klima pou dir bann frekans - frekans sanzman ki parey bann peryod lapli, i sanze. Bann gran peryod soley osi i sanze. So, vwala. Sa i pou ed zot osi dan zot planifikasyon ekonomik zot travay ki zot ladan, akoz sa si zot ganny pen, e zot depan lo la.

E osi nou bezwen osi mazin nou Sekter *Tourism* ki en endividi ki anvi al en vakans, ki anvi vin Sesel osi i kapab... Akoz mon osi mon fer sa. Letan mon pou kit mon pei, pou al dan en lot pei, mon anvi konnen kalite letan i ete laba pandan sa peryod letan ki mon pou laba. Mon anvi konnen.

Si mon pou fer 5 zour mon anvî konnen. Pou mon prepar mwan. Si i so, si i pou fre, si i pou tonm lapli. Si pou annan movetan, si pou annan siklonn. Tousala, i bann keksoz ki ozordi nou pran li konsyan konman *un être humain* kot i konsern letan.

So, sa touris osi la avan i vin Sesel i fer son bann provizyon pou li regard letan. E la i pran bann desizyon enformen, ouswa i pran bann proteksyon nesaser, i prepar li si i konnen i pe al lo en misyon, ouswa en keksoz ki i bezwen ariv laba, so i konnen ki i ekspekte dan sa landrwa kot i ale.

So, tousala i bann keksoz ki servis meteoloji mon krwar i la pou li kapab pas sa lenformasyon. E osi, i pa zis annan lenformasyon kapasite pou ou kapab deteksyon. Me osi ou bezwen kapab osi partaz sa bann lenformasyon osi. E se la kot nou antre konman sa rezyon li menm li. Nou pe vwar poudir bann tandans ki pe arive. Bann *zone* siklonik in apros lo nou bann *Outer Island*. In konmans tape e nou pa konnen demen si i kapab avans ver lo nou isi. So, i enportan ki sa bann, sa lorganizasyon i kapab ganny bann zouti modern, nesaser, ekipe pou zot kapab donn nou bann *real-time*

*information*. Akoz ozordi i annan bann pei parey Lanmerik ki servi, i vremen avanse zot sistenm, zot kapab donn ou lo en *hourly basis*, en previzyon, e zot vremen *accurate*.

E si ou al *online* i annan bann diferan *apps* ki nou kapab al gete lo nou telefonn, ki donn nou bann *weather forecast* ki vremen, vremen *accurate*. Si in dir ou lapli pou tonbe, lapli pe al tonbe. E si soley, ou pe vwar soley.

So, avek sa Mr Speaker, mon vwar poudir i annan nesosite, e sa Mosyon i pe demann Gouvernman pou met resours. Me pa zis Gouvernman. Mon krwar i annan osi bann lorganizasyon ki depan lo bann previzyon letan. Nou'n koz lo telekominikasyon, *Cable & Wireless* ki'n pare pou fer sa zes, akoz movetan definitivman i pou afekte son servis.

Be la nou lans lapel osi avek bann lezot lakonpanyen ki bezwen sa. Nou annan *Airtel*, nou annan lezot ankor, ki osi depan lo bann previzyon letan pou donn en koudmen. Mon konnen SCAA osi i annan en rol ki i bezwen zwe pou avyon kapab apoze, pou kapab mentenir en *safe airspace*, pou kapab donn *advice*.



Be zot osi zot kapab annan en kontribisyon ki bezwen ganny fer anvii ki sa lekipman ki an keston, i pa pou dernyen lekipman. I annan bann lezot lekipman osi mon krwar ki enportan ki bezwen avanse pou kapab donn bon previzyon.

So, avek sa Mr Speaker, mon vwar i annan en nesosite pou donn sipor sa lorganizasyon pou kapab donn nou bann *real-time information* lo kot i konsern nou klima, e previzyon letan. Mersi.

**(APPLAUSE)**

**MR DEPUTY SPEAKER**

Mersi Onorab Aglae. Onorab Hoareau, ou prosen lo lalis.

**HON JOHN HOAREAU**

Mersi Mr Speaker. Bonzour Mr Speaker. Bonzour tou dimoun a lekout. Mr Speaker, mon pa pou long lo sa Mosyon, me selman mon le fer enn de pwen resorti. Premyerman mon le fer lo rikord ki, i annan en pti pe lopinyon en pti pe diferan lo zafer sanzman klima lo lemonn aktyel.

I annan serten dimoun ki krwar poudir sanzman klima i en fenomenn natirel ki arive pandan serten peryod lannen. An vi ki ler ou get listwar lemonn li menm, dernyen *ice*

*age* ti ariv 11mil700an pase, e in ariv plizyer fwa bann lezot *ice age*. So, sa bann letan ti napa sitan lenpak. Ti napa lenpak imen ou kapab dir. In plito bann sityasyon latmosferik ki'n kapab koz serten sanzman avek klima li menm.

Alor, si imen pe koz sanzman klima, oubyen pe enfliyans sanzman klima, i touzour en keston ki nou kapab fer en gran deba lo la. Ki fason nou adapte? Mon krwar sa i le pwen esansyel. Ki fason nou adapte avek sanzman klima? E ki fason nou fer ki i annan mwens lenpak posib lo nou imen ki pe viv?

Premyerman, ler nou pe get Mosyon ki'n ganny anmennen par Onorab William, i pe demann pou met en pe plis resours dan lanmen servis meteoloji pou kapab konnen davans, predir davans avek plis presizyon, ki kantite lapli pou tonbe, letan i tonbe, e ki sezon - ki fason nou pou kapab kontrol en pti pe lefe ki bann gro lapli i fer?

Mr Speaker, anliny avek sa Mosyon mon krwar i osi esansyel pou nou vwar en pti pe an revi stratezi Gouvernman ki ganny enplimante par LWMA konman sa lazans. Ki son stratezi lo kote ede pou redwir lenpak lo sanzman klima? Vi ki

li *LWMA*, se li ki zer si oule, bann dese, bann salte ki nou vwar lo *landfill* souvandfwa.

Bon, nou annan gro problemn plastik. Ozordizour, bann pei ki ti enport plastik pou fer resiklaz pe konmans dir non, nou pa oule plastik ankor. Lasin pe fer retournen plizyer mil *container* plastik *to the point of origin*. Kot i sorti. E zot pe remarke poudir plastik, menm ki nou dir nou resikle plastik, plastik ler ou sof li i degrade. Sa prodwi resiklab pa kapab vin parey i ti ete avan ki i ti ganny pas atraver sa bann prosedir.

E pli ale ou kapab servi plastik petet pou resikle li pandan 2 ou 3 fwa, me ou pa kapab kontinyelman resikle li, akoz sa degradasyon ki arive avek bann plastik.

I osi lefe ki nou stratezi lokal isi, nou fer ranmas plastik e nou met dan *container*, nou anbale, nou anvoy deor. Me nou kapab revwar ki bann lezot pei pe fer ki annan menm problemn dese avek nou, ki kapab minimiz en pe lo sanzman klima.

*Incineration* par egzanp. Ozordizour i annan serten pei, sirtou dan bann landrwa en pe dan *Nordic*, kot zot *incinerate* zot *waste*. E nou, nou vwar poudir tanzantan i ariv en dife lo *landfill*. Me pa ti a bon petet

nou revwar nou stratezi *management* kot nou bril sa salte nou menm dan en fason kontrole, dan en lizin, e nou servi sa lenerzi pou nou ganny elektrisite avek?

E sa bann laseminen? Sa bann laseminen i ganny modifye dan en fason pou retir bann depozit metalik, bann depozit ki pa bon pou al dan latmosfer. E an prensip, ou kapab refer lenerzi *from waste to energy*. Ou kapab reservi sa lenerzi ki ganny trouve dan bann prodwi *petroleum*.

Bon, sanzman klima li menm parey Mosyon pe demande, se ki meteoloji i ganny ekipe avek en *Doppler radar*. En radar ki an prensip i kapab vwar ki kantite delo i annan dan latmosfer dan bann nyaz, e ki bor sa lapli pou tonbe. Sa, parey in ganny dir avan mwan, bann lezot Onorab ki'n koze in fer zistis sa pwen. Se ki, ozordizour lagrikiltir, *tourism*, e lezot biznes, e menm lapes. Tousala i depan lo bann previzyon meteoloji.

E si nou get an 1997 a 1998, apepre 45poursan aktivite lapes ti bezwen redwir. Lagrikiltir parey, e *tourism* e lezot biznes ti ganny afekte par sa fenomenn *La Nina*, kot lapli i tonm en sel kou, en bon pe

letan, en bon pe lapli dan en pti morso letan.

So, sa bann keksoz koumsa nou ti kapab minimiz lenpak ki annan lo lekonomi, si nou ti annan bann pli bon previzyon, bann fason pli presi pou kapab target nou resours, e fer sir ki letan ki lapli pe tonbe, en kantite koumsa, i pa pe afekte nou bann landrwa. Sirtou nou bann *coastal plain*. Nou pe fer sir poudir nou pe netway nou bann rigol, fer sir ki bann desarz i ganny desann ase byen i ariv dan delo sale. Dan lefe ki sa delo pa akimil lo bann *flatlands* e fer inondasyon.

Bon, asosye avek sa osi, nou annan osi lefe *landslide*, *rockfall*. Tousala i bann problem ki arive avek bann lefe kot lapli i tonm for. Osi asosye avek sa nou annan... Avek sanzman klima, nou annan problem *coastal erosion*. E souvandfwa si lapli i tonm for pandan letan kot i annan radmare parey nou dir, nou vwar i afekte bokou nou lakot.

E an prensip se sa rezon osi ki Sesel nou'n kapab *gère* serten larzan pou nou kapab fer bann miray, oubyen bann *rock armoring* en pti pe partou lo nou lakot. E nou ankor pe kontinyen fer.

E mon salye zefor ki Gouvernman in fer Beau Vallon pou fer sir ki nou annan sifizaman proteksyon kont nou bann lenfrastriktir, parey semen, a bann letan kot i annan radmare an menm tan ki i annan gro lapli kot nou vwar ki sa bann delo i tant pou akimil lo bann *flatland areas*.

Mr Speaker, mon vwar poudir sa Mosyon i annan bokou merit. I en pli, si oule, ki nou pe fer avek Gouvernman pou revwar sa size servis meteoloji ki fason nou kapab ed zot pou kapab donn en pli bon *forecast*. Alor, avek sa 2 pti mo Mr Speaker, mon pou remerci ou.

**(APPLAUSE)**

### **MR DEPUTY SPEAKER**

Mersi Onorab Hoareau. Mon konsyan ler, akoz programasyon *SBC*. Solman i annan zis 2 Manm ki reste, ki'n endik mon poudir i le koze. Onorab Cosgrow, avek ou, i pou fer 3. Mon konsyan poudir nou pa pou annan en lot Mosyon apre.

Madanm Clerk in sipoze ganny en notis lo la, ki fer ki nou kapab ale, nou fini. Olye ki nou pran *break* la pou retournen 2er pou zis 3 dimoun koze, akoz tou bann enterven

pa pe koz lontan lo sa Mosyon. So, nou ava kontinyen. E zisteman prosennman nou pou envit Onorab Cosgrow.

### **HON WALLACE COSGROW**

Mersi Mr Speaker. Mr Speaker, mon anvi aport mon kontribisyon ozordi lo sa Mosyon ki'n ganny prezante par Onorab William. Annefe Mr Speaker, mon pe lir enn de bann zafer ki mon lir konsernan, an relasyon avek sanzman klima.

Mon pe lir en lartik la kot i dir limanite i *at a crossroad* ozordi. E sa i an relasyon avek en rapor ki ti ganny pibliye le 20 Mars 2023. E sa se Rapor *Intergovernmental Panel on Climate Change* - sa ki nou apel li *IPCC*.

Annefe *IPCC* i en *panel of* bann syantis plizoumwen, bann syantis klima kot zot fer bann analiz baze lo bann diferan lenformasyon ki zot gannyen, ki'n ganny kolekte *over* en peryod letan, pour analiz bann diferan sanzman klimatik dan lemond.

E zot pe dir ki ozordi - *well* ozordi, me solman pou en bon pe letan i annan bann *warning* ki pe vini ki pe dir avek limanite, lemond, ki letan pe sanze, klima pe sanze. E nou bezwen fer serten aksyon pou

nou kapab ranvers sa sityasyon. In ganny dir par koleg Onorab John Hoareau ki i annan diferan lopinyon lo la, en?

I annan diferan lopinyon, i annan diferan dimoun ki dir ou klima, sanzman klima i en proses ki'n arive pou plizyer, plizyer mil, milyon deseni, lannen. E i en keksoz ki normal, natirel, e ki pe arive. I annan ki dir ou poudir, be non se aksyon imen ozordi ki pe fer sa. E i annan ki dir ou i en melanz tou lede, e ki aksyon imen pe akseler sa sanzman.

Mr Speaker, pe enport ki ou *school of thought*, ki ou, kwa ki ou *subscribe to*, sanzman klima i reel, i pe arive, i la devan nou laport. E nou bezwen fer keksoz pou *arrest* li dan en fason. Kwa ki pe kree, Mr Speaker, problem klimatik ozordi ki nou pe fer fas avek, e ki annan en kantite zefor ki pe ganny fer dan lemond antye pou rod bann solisyon?

Lakoz prensipal Mr Speaker se, sa ki pe ganny eksplike par bann syantis se, sanzman klimatik koze par *industrialization*, Mr Speaker. Savedir kot nou pe sof nou latmosfer avek bann gaz, bann emisyon, bann *greenhouse gases*, atraver prodiksyon bann

gro lendistri, sirtou bann gro pei endistriyalize.

E souvandfwa bann pti pei parey nou Sesel, nou santi lenpak aksyon bann pei pli endistriyalize ki nou, pli for e pli sever. Pou bokou letan nou'n krwar, e i lefe, i le ka. Pou bokou letan nou'n krwar ki poudir sa i afekte zis nou, e pli gran lenpak pou lo nou. Be larealite Mr Speaker se ki, si ozordi nou annan en problem klimatik, wi set aköz sa bann pei endistriyalize ki kontribye plizoumwèn dan sa lesòfman later. Me i pou afekte nou tou.

Ozordi enn bann pli gran sant komers dan lemonn *New York, Manhattan*, si i arive ki *sea level* i *rise* a en serten kantite nivo, zot osi zot pou dan difikilte. Ler *icecaps* i *melt* anler dan bann *polar region*, wi i *melt* laba anler. I afekte, be i ranpli anba kot nou. So, i annan tout en konektivite dan sa ki pe arive.

Alors zefor Mr Speaker, i bezwen ganny fer par nou tou. Malgre nou ptipti. Ki ou gro, ki ou ptipti, zefor i bezwen ganny fer par nou tou, pou nou kapab *arrest* sa sityasyon e fer ki nou met sanzman klimatik anba kontrol. Me sanzman klimatik i la, i pe vini, i avek nou.

E nou bezwen rod fason ki manner nou dil avek, ki

manner nou *mitigate* sa bann zafer parey in ganny dir, e ki manner nou *warn* nou lekor, nou popilasyon of bann danze ki kapab ganny prezante dan limedya. Ki kapab afekte *livelihood*, ki kapab afekte biznes, ki kapab afekte ki manner lemonn li menm i *operate* dan normal.

E Mr Speaker, enn bann akter, si oule - bann lazans ki enportan dan sa laspe, se bann servis meteoloji dan lemonn. Se bann syantis, bann dimoun ki'n etidye lasyans meteoloji, e zot kapab fer serten prediksyon. Zot kapab fer serten analiz, e fer serten prediksyon an sa ki konsern sanzman klimatik, me osi sanzman letan dan limedya.

So, nou servis meteoloji Sesel pou mon anmenn li pli *closer to home*. Nou servis meteoloji Sesel i nou premye laliny defans an sa ki konsern *warning* e pou averti lepep, pou averti pei lo okenn sanzman klimatik lonterm, me osi sanzman klimatik, sanzman letan dan limedya.

E i enportan, Mr Speaker ki, ler nou pe koz lo... I annan en kantite priyorite Sesel, me solman i enportan ki ler nou pe koz lo sanzman letan, sanzman klimatik, i enportan ki nou donn latansyon e lenerzi avek sa lorganizasyon, pou ki zot

kapab fer sa travay pli byen. Zot fer en kantite travay lokalman, mon konnen akoz zot in deza en lazans ki ti tonm anba mon responsabilite en serten letan. Zot fer en kantite travay.

Zot fer en kantite travay petet ki nou pa realize, sirtou avek Sekter Lavyasyon. Ozordi, in ganny dir par Onorab Aglae ki nou annan nou en gran siperfisi ki anba nou ziridiksyon ki nou *manage*. E ki swa lo later, lo lanmer, e osi dan lezer, kot nou bezwen osi donn serten lenformasyon, pa zis Sesel, pa zis nou bann zil, me osi, bann dimoun ki travers dan nou teritwar.

So, zot fer en kantite louvraz dan sa laliny. E ozordi nou kapab dir pou dir avyon, bato, okenn *vessel* ki travers dan nou teritwar, mon krwar zot fer li avek konfidans ki sa servis meteoloji ozordi ki pe ofer sa servis ki zot bezwen, i ganny fer a en nivo tre profesyonalize. Nou annan nou bann dimoun ki *très au fait* avek sa ki zot annan. Nou annan en kantite lekipman osi.

Fodre pa nou bliye sa i annan en kantite lekipman ki'n ganny investi dan sa servis meteoloji vizavi lavyasyon. Me osi pou predir letan pou nou popilasyon.

Zot servis ki zot donnen i en servis ki ganny servi, parey mon'n dir, par lavyasyon. Me osi en enportan par nou popilasyon pou dimoun toulezour ki pe desann, ki pe al travay, ki annan son bann tripou, son bann keksoz pou fer. Zot depan en kantite lo meteoloji pou konnen ki mannyer ou bouze lazournen.

Me nou annan osi bann fermye ki par natir nou Sekter Lagrikiltir isi, *very few* dimoun ki petet i plant anba kouvertir. Zot bezwen konnen kan zot pou senmen, kan zot pou met dan later, kan zot pou rekolte, ki kalite bann *crops* ki zot pou mete, depandan lo diferan kalite letan.

So, zot osi zot bezwen sa servis. Nou annan bann fermye -bann peser (pardon), ki bezwen sa bann servis, akoz zot bezwen konnen zisteman. Konmela bato i pli gro, i pli ekipe, zot kapab bouz pli lwen avek Mahe. So, zot bezwen konnen ki pe arive dan sa rezyon kot zot pe ale. So, zot donn en servis an zeneral ki vreman, vreman enportan.

Me Mr Speaker, pou nou kapab fer sir ki servis meteoloji i kontinyen donn sa servis, neserman nou bezwen investi dan sa servis, ki swa dan lekipman. Parey mon'n dir,

i deza annan en kantite lekipman ki zot servi, akòz sansan zot pa ti pou kapab fè serten prediksyon sa travay ki zot pe fè ozordi. Nou bezwen envesti dan lekipman, me nou bezwen envesti osi dan dimoun.

Yer avek ozordi nou'n koz lo en Mosyon ki prensipalman nou pe koz lo travayer, remersiman travayer. Me laba osi i annan serten kategori travayer ki nou bezwen remersi zot pou sa louvraz zot fè dabor. Me nou bezwen osi kontinyen antrenn zot, akòz mon pa konnen si i en domenn ki bokou nou bann zenn Seselwa petet pa ankouraze pou al pran, ouswa zot pa pe ganny lenformasyon lo la.

Me i en domenn lasyans, syantifik, kot i annan kantite loportinite, i vreman teknik e nou bezwen donn plis *training* ladan. Nou bezwen donn plis *training* si nou anvi, si nou pe met latansyon lenportans lo sa *issue* sanzman klimatik. Nou bezwen donn plis *training* bann *climate scientist* pou zot kapab fè sa travay pli byen.

So, *training* i enportan. Tre, tre enportan. Ozordi dan servis meteoloji nou annan etranze. Malerezman, nou annan etranze, nou annan serten nasyonalitye. Plizoumwenn bann *Kenyan* ki pe vin donn ou

en koudmen, set akòz nou napa sa kantite lekspektiz dan sa domenn. Me nou bezwen nou menm nou konman en pei, met en zefor ladan, e *train* bokou plis dimoun dan sa domenn lasyans.

Nou bezwen lekipman, nou bezwen dimoun Mr Speaker, be nou bezwen osi partenarya. Mon konnen poudir in ganny nonmen ki servis meteoloji i annan lagreman avek *Cable & Wireless*. Me nou pa bliye ki en pe letan pase servis meteoloji in osi annan Lagreman avek *IDC*, ki ozordi lo bokou bann zil *IDC* i annan bann *weather stations*, malgre i bann *small automatic weather station*.

Me solman i annan bann lagreman. Si ozordi nou kapab ganny lenformasyon *accurate* lo letan dan bann zil dan sid Mahe. Avek sid Mahe, ouswa en pe pli lwen, set akòz i annan sa zefor ki'n ganny fè, partenarya pou kapab anmenn sa servis bokou pli lwen ki zis Mahe.

E peser ozordi i benefisye. Bann biznes lo bann zil elwanye osi i benefisye pou zot konpran en pti pe letan ki mannyer pou sa. So, enportan Mr Speaker, zis pou *sum up*, se *training* pou lekipman i enportan, e osi partenarya.

Zis pou mon *wrap-up* Mr Speaker, mon krwar parey mon'n dir, rol Sesel ozordi dan sa zafer sanzman klimatik i enn ki ganny rekonnet, ki *crucial*. Nou form parti bann lalyans, si oule. Bann lalyans bann pei ki annan bann *common views*, *common goals* an sa ki konsern sanzman klimatik.

Sesel i form parti *The Alliance of Small Island States* kot nou pouse ansanm ek ban Pti Leta Zil dan Pasifik, dan *Caraïbes*, e osi dan Losean Endyen, kot nou pouse pou nou kapab fer lavwa bann Pti Leta Zil tandé. Akoz nou ganny afekte sirman avek sanzman klimatik. Nou pouse pou nou ganny lasistans, sirtou avek bann gro pei endistriyalize, pou kapab ed nou dan nou bann zefor adaptasyon; bann zefor miltigasyon, adaptasyon. Nou pouse pou kapab fer sa arive.

E servis meteolozi i enn bann servis ki ozordi i osi donn en koudmen. Mon konnen avan ki i annan bann *Conference of Parties* pou sanzman klimatik, nou bann teknisyen. Mr Amelie i enn bann dimoun ki al bann *preparatory meetings* pou fer sir ki zot koz lo sa lasyans e zot pouse pou ki Sesel osi i ganny tandé, i ganny rekonnet.

Me zis pou mon avan mon terminen, mon ti a kontan - pa

dan negativite Mr Speaker - mon ti a kontan ki... Ozordi nou pe koz en keksoz ki mon krwar nou tou nou vwar lo menm laliny. Souvandfwa nou vin dan Lasanble e parfwa nou annan serten diferans, en? Diferans dan lafason ki nou pans lo serten keksoz.

E ler nou fer sorti, souvandfwa Onorab ki'n anmenn Mosyon, parfwa i dezagree avek nou. Dezagree letan nou pe dir Gouvernman pa bezwen fer sa, fer isi, fer laba. I dezagree, i dir nou Gouvernman pe fer byen, pe isi, pe laba. Me solman apre nou war en Mosyon kot li menm li i vini i dir Gouvernman fodre fer sa.

So konmsi, malgre sa topik ki nou pe koz lo la, i en topik ki mon krwar nou tou nou lo menm laliny, menm *level*, mon ti ava voudre ki zot konpran parfwa nou senserite ler nou pe vini nou pe dir, nou pe fer serten kontribisyon kot nou anvi keksoz i mars drwat.

So, pa bezwen ganny nou an mal, akoz nou osi nou pe kontribye. Nou pa neserman agree dan tou keksoz, me solman nou pe kontribye pou fer keksoz al byen. Avek sa Mr Speaker, mon napa problemm avek donn sipor sa Mosyon. Mon krwar i en Mosyon ki al



dan en bon direksyon, akòz i pou Sesel e i pou benefis Sesel. Mersi bokou Mr Speaker.

**(APPLAUSE)**

**MR DEPUTY SPEAKER**

Mersi, Onorab. Aprezan mon a envit Onorab Audrey Vidot pou pran laparol.

**HON AUDREY VIDOT**

Mersi, Mr Speaker. Bonn apre midi tou dimoun ki a lekout. Mr Speaker, nou tou nou pou agree ki Sesel i enn parmi bann Pti Leta Zil ki'n fer li son priyorite pou angaz li dan lalit pou konbat kont bann risk, e osi annan kanpany kont prevansyon lo lenpak sanzman klima.

E sa in vin atraver plizyer lorganizasyon e lazans. Ki swa in vin ansanm oubyen endividyelman, zot pe fer serten travay e ki ankor pe fer pour angaz aktivman dan kanpany, e lalit pou edik otan nou kous popilasyon lo lenportans diferan sityasyon, e konpran sanzman klima, e kwa ki nou, nou kapab fer, e kwa ki nou merit fer konman bann endividi, pou fer pou nou osi ede kontribye dan sa lalit. Pou nou vwar e konpran ki lenpak sanzman klima i annan lo nou pti pei. E ki manner i afekte

nou bann endividi ki reste e viv dan sa lanvironnman.

E, Sesel in santi lenpak sanzman klima diran lannen, plizyer lannen. E nou'n obzerv sa atraver bann sanzman dan nou letan. I annan nou, nou pou obzerve petet nou pou santi poudir letan soleye i vin en pti pe pli so ki labitid. I annan pou vwar petet an term, baze lo bann Manm ki'n koze, ki zot in vwar zot bann distrik kot in ganny en lenpak gro lapli, linondasyon. E in afekte lanvironnman zot bann zabitan.

E nou'n vwar poudir i enportan ki byensir Lazans Meteoloji i ganny resours neser pou kapab annan lekipman pou detekte, ou annan plis lenformasyon ki manner i kapab fer prevansyon, pou kapab enform popilasyon lo risk letan, ki kapab sanze diran lazournen. E byensir biznes osi ki depan lo klima pou reasire ki zot biznes i fonksyonn byen, e lekonomi pei i mars byen.

E ozordi apre plizyer levidans ki nou'n vwar resaman osi, parey loter Mosyon in fer resorti, ki in annan serten aktivite dan nou letan ki nou pa abitye eksperyans. E meteoloji osi in sorti in donn son pwennvi lo la, ki zot mank resours pou

zot kapab annan plis analiz e annan plis lenformasyon ki zot kapab anmase, pou zot kapab detekte, e edik popilasyon lo risk, ki petet sa bann sanzman dan letan i kapab anmennen pou nou pti pei, e nou lanvironnman ki nou, nou pe viv ladan.

Mr Speaker, Mosyon i kler me mon bezwen siport mon koleg Onorab Cosgrow letan nou pou dir avek loter Mosyon ki wi, i annan serten size ki kapab vini sorti kot zot, *LDS*, ki nou annan nou diverzans lopinyon lo la, e i normal pou nou kritike.

E ler nou kritike, zot kapab pran li en kritik dan en fason konstruktiv. Oubyen si pou zot, zot vwar li i negativ, i tris. Me nou anvi vwar keksoz, e pep Seselwa annefe, i anvi vwar keksoz i mars pli byen, e ganny fer pli byen.

E se pou sa rezon ki nou avans sa bann kritik, aköz nou anvi keksoz i mars byen. A lafen dizour, se nou tou ki reste dan sa pti pei, nou preski fanmir antre kanmarad aköz nou viv dan en kominote kot nou annan fanmir ki viv dan kominote, ki zot bann diferan dirizan zot ladan. E nou bezwen asire ki letan bann devlopman oubyen resours i ganny distribye, se ki

nou tou ki viv dan sa pti pei Sesel, nou benefisyè.

E mon santi osi ki sa Mosyon ti kapab al plis lo, petet dan plas zis met bezwen lekipman neserer, me met lanfaz lo resours. Aköz, apart ki lekipman, mon santi ki Lazans Meteoloji i annan en lot rol osi ki kapab fer pou pli byen ranforsi son ledikasyon, pou ki swa prevansyon, osi kwa ki nou osi nou bezwen prepar nou.

Bann ki annan lentansyon. Nou bann zenn ki annan lentansyon pran en karyer dan sa lazans. Nou bezwen bann dimoun ki spesyalize, e byensir i bezwen resours pou li fer sa. E i bezwen sipor finansyel. E nou santi poudir sa osi ti kapab - pa zis lekipman parey mon dir - ti kapab anplifye sa demann ki sa lazans i bezwen, pou li kapab pli byen fer son travay.

E nou lo sa kote latay, nou kontinyen dir pou dir, si en lorganizasyon i bezwen resours, ki swa imen, ki swa an term lekipman, oubyen pou li kapab enplimant son bann program, pou pli byen sansibiliz e prezerv nou popilasyon, Protez li kont okenn danze, risk ki egziste, nou bezwen siporte. Nou, nou pou siporte.

Kot i annan son merit, nou pou fer li. Me kot i annan

nesesite pou nou kritike pou fer li pli byen, nou bezwen kontinyelman fer li. E nou pou fer li lo sa kote latab. E san dout mon osi mon pou aport mon sipor anver sa Mosyon ki la, akoz i pe adres en size ki nou santi poudir i pou anmenn bokou plis sipor anver sa lazans, pou li kapab benefisye - pa neserman zis sa lazans - me atraver sa lekipman ki i pou bezwen. I pou ed li pou nou kapab fer son travay, ki pou annan en serten lenpak pozitiv anver popilasyon Seselwa. E i enportan ki bann tel size parey i vin pli souvan.

Mr Speaker, nou tou nou konnen poudir Sesel i pa tousel dan sa lalit dan prevansyon e edik lo size sanzman klima. E ki lenpak advers i kapab fer an term nou konman en pti pei Leta Zil, akoz nou pa an izolasyon avek lemonn. E bokou fwa bann Pti Leta Zil parey Sesel, nou vwar nou pe fer en kantite sakrifis. Nou vwar nou pe met en kantite bann regilasyon, bann aksyon ki nou pe pran pou nou fer sir ki nou prezerv nou lanvironnman, nou prezerv nou bann aki. Pou asire ki nou osi nou kapab kontinyelman lalit kont bann lenpak sanzman klima.

Me, par kont bann lezot pei ki zot, ki pa pe pran zot

responsabilite, e zot annan bann gran kontribisyon ki zot fer ki ozordi bann Pti Leta Zil parey Sesel i vin vilnerab kot i konsern lenpak sanzman klima. E vwala kot mon ensiste ki apart ki lekipman, resours neser i bezwen ganny donner avek Lazans Meteoloji. Byensir pou angaz zot dan zot bann konversasyon, bann travay *networking* ki zot fer avek bann diferan lorganizasyon enternasyonal, pou zot kapab pli byen koz pou Sesel, ki nou, nou ganny afekte par bann desizyon e bann aksyon ki zot bann gran pei devlope pa pe pran responsabilite, e ki nou konman en Pti Leta Zil nou ganny afekte; ki swa atraver letan. E osi, nou bann aki kot nou pe koz nou bann zil, kot nou lanmer, e nou bann aki lanmer osi ki ganny afekte.

E nou bezwen fer sir ki sa lazans, apart ki zis serten lekipman, me i annan sa resours pou li kapab prepar bann profesyonnel, e osi *voice out* nou bann konsern konman en pti pei.

E byensir dan zot bann travay osi lo nivo nasyonal, avek bann diferan lorganizasyon non-gouvernmental, ki ankor pe fer serten travay pou sey tous kous popilasyon lo nou

responsabilite, nou rol konman bann endividi. Kwa ki nou kapab fer pou nou osi fer sa pli bon diferans kont lalit sanzman klima. E lo sa pwen, mon pou felisit tou bann ki pe fer sa bon travay, pou kontinyen.

Zot louvraz i reste enportan e nou bezwen zot pou zot kapab kontinyelman edik popilasyon. Alert nou kont bann danze ki sanzman klima i annan lo nou. E osi byen, bann lorganizasyon non-gouvernmental ki ankor pe fer serten travay dan bann diferan kous. Menm dan bann kominote.

Nou konnen *COVID* ti'n anpes serten pou zot pli aktiv. Nou swete la zot in re kapab reorganiz zot. E nou swete ki resours neser a ganny konsidere pour ki Lazans Meteoloji i ganny zot bann fasilite, lekipman, ou resours ki zot bezwen pou zot kapab fer zot travay. E lo sa not mon a dir ou mersi Mr Speaker pou donn mon laparol.

**(APPLAUSE)**

**MR DEPUTY SPEAKER**

Mersi. Mersi Onorab Vidot. Dernyen enterven an lo sa Mosyon avan ki nou donn drwa repons loter Mosyon, se Onorab Bernard Georges.

**HON BERNARD GEORGES**

Mersi Mr Speaker. Bonn apre midi Mr Speaker. Bonn apre midi tou bann Manm Onorab e tou dimoun ki pe swiv nou dan lakour.

Mr Speaker bomaten, en Manm Lasanble ti dir ki - an parlan Mosyon avan sa enn - ki Onorab William ti anvi anmenn en Mosyon ki ti pour fer nou sorti lo en *high*, an felisitan Gouvernman. E mon kontan poudir ki malgre sa parol, nou pour sorti lo en *high* ozordi atraver sa enn Mosyon, akoz parey Manm Lopoziyon in fer resorti, sa Mosyon pou ganny zot sipor e i pour ganny nou sipor.

E alor lo dernyen Mosyon, lo dernyen zour sa enn trimes sa Lasanble, sa Lasanble pe viv son moto, "Linite dan Diversite". Malgre ki nou annan en diversite isi ki separ nou, nou pour ini otour en Mosyon ki tous nou tou. E mon krwar sa set en gran legzanp, ki nou Lasanble i kapab donn avek nou Nasyon.

Mr Speaker sa de dernyen Manm, in osi profit lokazyon ozordi pour eksplik filozofi Lopoziyon dan zot parti, ki i annan serten moman kot zot pa pour kapab siport sa ki nou, lo nou kote nou pe dir.

Me nou ganny apele pour konpran zot, konpran ki nou bezwen annan sa diversite, nou bezwen annan sa Lopoziyon, e ler zot fer li zot fer li, zot fer li an bonn fwa. E mon ti a kontan ozordi, felisit zot pour sa remark. E set egzakteman koumsa ki en Lasanble i devret marse.

E napa dimoun ki konn sa pli byen ki nou, akoz pandan 28an dan sa dernyen 30an, nou ki ti asiz lo zot kote latab e nou'n konpran tre byen ki mannyer en Lopoziyon i opoze, san ki i desann dan rigol.

Me Mr Speaker se pa sa mon krwar ki problem. Problem se pa ki ou bezwen pran en pozisyon diferan, oubyen en pozisyon ki opoz Gouvernman, me se lafason dan sa keksoz i ganny fer ki parfwa anmenn bokou, bokou diversite dan sa Lasanble e bokou difikilte dan sa Lasanble.

E nou bezwen zis demann nou lekor, akoz ki yer ek ozordi keksoz in pas bokou plis *paisiblement* ki dan sa bann dernyen semenn? I annan en fason fer. Se pa, se pa sa ki ou dir ki enportan, se lafason ki ou fer li.

E donk an repons avek mon bann zanmi lo lot kote latab, mon akey sa ki zot in dir. I byen ki nou annan sa

distenksyon, nou annan sa diferans, nou annan sa Lopoziyon. Apre tou nou pa kapab nou tou mazin parey, me mon bann zanmi i annan en fason pour fer.

E si zot fer li parey zot in fer pour sa de dernyen zour, mon krwar nou ava annan en Lasanble ki pour viv *paisiblement* e ki pour travay pour byennet nou pei, olye zis lager ant kanmarad, rod *point of order, matters of privilege*, eksetera. Alor kekfwa nou kapab sorti ozordi avek - lo sa note.

Mr Speaker tou sa ki bezwen ganny dir lo sa Mosyon, in ganny dir par tou bann entervenans bomaten e mon pa pour vin repet sa ki zot in dir. Me mon pran laparol ozordi pour anmenn enn de legzanp ki mon'n viv ladan - enn de legzanp pour montre akoz ki konteni grander nou pei, i absoliman nesaser (parey sa Mosyon pe demann nou ozordi) pour nou moderniz nou bann fasilite, nou bann lekipman.

E wi, Onorab Vidot mon konpletman dakor avek ou, e Onorab Cosgrow osi, *train* plis nou bann dimoun. E la mon profit sa lokazyon pour felisit tou bann travayer dan seksyon meteoloji pour sa travay ki zot fer. I pa en travay fasil, zot

bezwen travay dan bann ler ki difisil, sirtou avek bann avyon ki *overfly* nou teritwar 24 lo 24.

E zot fer en travay eksepsyonnèl pa toultan, avek bann kondisyon ki zot ti ava merite. Donk mon krwar Mr Speaker nou viv dan en moman kot nou bezwen rekonnèt sa ki'n ganny fer. Me osi pouse - parey Mosyon i demann nou - pour moderniz nou lekor e pour fer fas avek bann defi ki devan nou ozordi.

Mr Speaker mon premye pwèn ki mon anvè koz lo la, se ki nou bezwen realize ki nou pa en Pti Leta Zil. Nou pa en pti pei. Nou nepli en *Small Island Developing States*. Nou en gran pei.

Annefe, de semenn pase parey bokou zot, zot konnen mon ti annan loportinite pour mwan al Aldabra. E ankòr en fwa ou realize an mezir ki ou pe vwayaz dan nou pei, ki grandè nou pei i ete. E annefe set en pei enorm e nouvo fason dekrir - nouvo fason dekrir bann pei parey Sesel, se pa pou apel zot bann *Small Island Developing States* me pour apel zot bann *large Oceanic nations*.

E nou en *large Oceanic nations* isi akòz nou sipèrfisi i telman gran. E en fwa ki nou sezi sa konsepsyon, ki en konsepsyon pozitif, *Small Island Developing*

*States* i gard nou deryer, i en konsepsyon plitò negativ.

Sa mo "small", sa mo "island", sa mo "developing", tou le trwa se trwa mo ki negativ. Tandis ki en *large Oceanic nation*, se - i anmèn en serten pozitivite e i fer, i fer ki dan sa lespri modernizasyon ki sa Mosyon pe apel nou pour pran ozordi, sa set en deskripsyon ki pli apòpriye pour nou pei.

E i pa ozordi ki mon dir sa. Bann Manm Lasanble ki la depi dezyèm Lasanble ler Onorab Esparon avek mwan ti antre dan Lasanble, i ava rapel ki a sak fwa ki mon annan en loportinite, mon dir ki Sesel i pa en pti pei, i en tre, tre gran pei.

Annefe i pran plis letan pour *fly* sorti Mahé pour al Assomption, ki i pran pour sorti Mahé pour al *Maurice*. 2èrdtan edmi konpare avek 2èrd tan 15minit. Alor pour donn dimoun en apèrsi lo sa grandè sa teritwar.

Me set akòz nou gran ki nou defi i bokou plis ki si nou, nou ti pli pti. E se sa mon krwar - anfen mon pa krwar - mon konvenki se sa ki resanble nou ozordi otour sa Mosyon.

Mr Speaker mon ti dir ki mon ti anvè donn de ou trwa legzanp, permet mwan premyèman pour rapel en

lensidan. En fwa mon sorti kot en zanmi ki nou ti vizite, mon madanm avek mwan tou le semenn. E ki ti reste - par koensidans tre pre avek kot Onorab Cosgrow i reste.

E nou ti pe retourn dan lakour en swar, dan pti 10er edmi - 11er mon mazine, e Radyo Sesel ti ankor *on*. E nou'n demann ek nou lekore be Radyo Sesel i sipoze ferm 10er ki mannyer 11er - 11er edmi *whatever*, Radyo Sesel i ankor *on*?

E anmezir ki nou ti pe *drive*, nou'n realize ki Radyo Sesel ti'n reste *on*, pour kapab enform Agaléga ki pa enn nou zil - i *belong to Maurice* - pour kapab enform Agaléga ki ti annan en siklonn ki ti pe vin ver zot, e ti pour eksplik avek zot trazektwar sa siklonn.

Agaléga pa ti kapab ganny okenn mesaz sorti *Maurice*. Zot pa ti kapab ekout radyo *Maurice* akoz zot tro lwen. Me zot ti kapab kapte Radyo Sesel. Alor vwala Mr Speaker en lot legzanp lo grander nou teritwar e ki mannyer parey bokou Manm in demande ozordi nou travay ansanm, dan sa demars pour amelyor nou rezilyans anver sanzman klima.

Dezyenm legzanp ki mon anvi donner se siklonn *Fantala*. E Onorab Aglae in dir bomaten

aziste rezon, ki an mezir ki sanzman klima, an mezir ki klima pe sanze i posib ki siklonn i ava komans mont ver nou.

E parey nou tou nou konnen, i annan detrwa lannen pase siklonn *Fantala* in pas lo Farquhar 300kilomet a ler, in detri Farquhar konpletman. E konmsi sa pa ti ase in vire, in retourn ankor enn fwa i re-tap Farquhar ankor, in detrir sa ki i pa ti'n detrir premye fwa. E konmsi sa pa ti ase, in vir ankor fwa e in retourn lo Farquhar en trwazyenm fwa pour li touy sa bann dernyen keksoz ki i pa ti'n touye.

E ok kekfwa nou pa ti pou kapab anpes sa siklonn, me erezman ki avek servis meteoloji nou ti kapab prevwar, e fer sir ki tou bann travayer ti antre dan *cyclone shelter*. E rezon mon dir sa se pour dan sa laspe modernizasyon, se pour montre ki mannyer 10an pase kekfwa, ti napa *cyclone shelter* lo nou bann zil. Me la tou bann zil dan sid kot i annan en popilasyon ki reste, in bezwen konstrir en *cyclone shelter*. E de semenn pase mon'n ganny loportinite pour vizit sa enn lo Aldabra.

I posib ki sa pa pou zanmen ganny servi. Me i enn bann fason i nou bezwen, met

nou lekor an previzyon pour okenn katastrof ki kapab arive.

E trwazyenm keksoz ki mon anvi koz lo la Mr Speaker, trwazyenm leksperyans ki mon'n viv ladan se lannen pase mon ti pe retourn Sesel lo *Kenya Airways* ki apoz isi 2er en kar bomaten. E apre en vol 3erdtan nou'n ariv lo *Eden Island* e mwan personnelman mon ti pe mazine "good, dan ankor en demi erdtan mon pour dan mon lili, mon pour ariv kot mwan."

Me malerezman akoz movetan, nou'n bezwen retournen e fer ankor 3erdtan pour retourn *Nairobi* kot nou ti'n sorti. E sa, posibleman akoz ti annan en mank previzyon dan letan e si ti ava annan sa bann posibilite prevwar pli boner, kekfwa avyon i pa ti a *take-off* ler i sipoze *take-off*, i ti ava esper sa movetan pase. E ki mon ti'n ariv dan mon lili, kantmenm pa 2erdm, me enn pti pe pli tar sa zour *instead of* en zour pli tar.

Alor Mr Speaker, tousala poudir ki mannyer en *weather radar* sa *Doppler radar* parey i ganny apele, i absoliman esansyel pour moderniz nou lefikasite previzyon letan, pour donn bann travayer meteoloji plis zouti pour zot travay avek e pour fer ki nou kapab viv an

sekirite. E nou kapab asir sekirite bann dimoun ki lo lanmer, otour nou, e ki dan lezer par lao nou parey mon'n dir, ki sa i ariv *round the clock 24/7*.

Alor Mr Speaker mon oule, an konklizyon, remersye tou bann Manm sa Lasanble, ki pour anmenn zot sipor pour sa Mosyon malgre i pa mon Mosyon, i pour Onorab William. Me osi dir ki mannyer ozordi koman en Nasyon, nou devret fyer pour bann servis meteoloji ki nou donnen. E ki mannyer nou devret parey Mosyon pe demann nou kontinyelman demann avek Gouvernman ki se sa ladministrasyon, ki se bann ladministrasyon ki pour swiv apre, pour moderniz nou sistenm, pour met nou *up-to-date* avek bann aktyalite, bann aktivite sanzman klima ki pe afekte nou.

Alor Mr Speaker avek sa detrwa parol mon ti a kontan asir Onorab William, ki i pour ganny mon sipor lo sa Mosyon akoz se en Mosyon ki ti byen merite. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Georges ki ti dernyen enterven an lo Mosyon prezante par Onorab Waven



William. Donk prezan nou ava envit li pour li fer son *Right of Reply* lo sa Mosyon.

### **HON WAVEN WILLIAM**

Mersi Mr Speaker. Dabor mon ti a kontan felisit e remersi tou bann Manm, tou le de lot kote latab ki'n koze. Zot in anmenn bann kontribisyon, ki mon vwar in edifye sa pep deor la vizavi sa size, sa Mosyon an menm tan lo lefe sanzman klima.

Mr Speaker me avan ki mon al lo mon konklizyon, mon ti a kontan ankor dan bonn fwa - letan mon'n ekout Onorab Vidot e Onorab Cosgrow, letan zot in fer serten analiz, mwan osi mon anvi dir avek zot ki pran sa ki mon pe al dir an bonnfwa, akoz si letan zot anmenn serten bann konversasyon ki zot tant pour distort realite, e tir keksoz dan konteks, otomatikman lo nou kote nou pour reakte pour fer sir ki sa pep deor la i ganny lenformasyon korek.

Akoz i annan tandans sa zwe politik lo tou le de kote. Me solman lenportans sa Lasanble, lenformasyon i bezwen ganny donner dan en fason reel, pa avek distorsyon. E si nou tonm dakor lo la, mon pa vwar akoz nou pa pour fer en bon travay isi dan sa setyenm Lasanble.

Mr Speaker lo - dan mon konklizyon mon ti a kontan dir mon'n osi ganny lenformasyon ki atraver *COI*, i annan en proze ki *COI* pe met devan, pour ganny sipor *the Green Climate Fund* e sa i pour en montan 70ekek milyon Dolar kot Sesel, *Comoros, Maurice, Madagascar* zot pour ganny asiste avek serten lekipman.

E sa mon'n ganny dir i annan posibilite ki Sesel i kapab ganny enn sa *Doppler radar*. Me selman Mr Speaker, i pour enportan ki Sesel parmi sa groupman *large Oceanic nation*, parey Onorab *Leader Zafer Gouvernman* in dir, Sesel pour bezwen zwe son rol e fer sir ki serten kontribisyon finansyel i ganny fer, pour asire ki sa proze i materyalize.

Akoz nou bann pei zanmi parey Linyon Eropen parmi lezot ki pe fer sa kontribisyon. Me Sesel li i pour bezwen kontribye \$2.4milyon mon krwar tou-le-z-an, letan sa poze i materyalize.

Mr Speaker nou'n - Manm in koz lo *training* anba sa proze li menm li, ki annan pou fer avek *hydromet* i annan en ta loportinite pour nou bann zenn Seselwa kapab ganny *training* dan sa *field*.

E Sesel pour bezwen dan sa groupman *COI* pouse ki zenn

Seselwa profesyonnel zot kapab ganny loportinite, pour zot kapab ganny sa bann *training*. Mr Speaker sa lekipman i tre enportan, e i annan pou fer avek lentansite divan parey mon'n souleve, lakantite delo ki bann nyaz i anmennen.

Me an menm tan Mr Speaker, atraver sa Mosyon mon ti a kontan met devan trwa konsern, an menm tan rekomandasyon anver Gouvernman dizour.

E sa bann rekomandasyon Mr Speaker, i annan en kou atase avek. Me anba bann tel Fon ki Sanzman Klima, anba *Paris Agreement* nou kapab pouse pour nou ganny lasistans Mr Speaker. An konversasyon avek Mr Vincent Amelie, in fer mwan konpran ki dan letan vandswet, bann avyon i ganny vreman difikilte parfwa pour apoze lo erport.

E i annan sa nesesite dan lavenir Mr Speaker pour Sesel fer en lot erport, vir dan en lot direksyon akoz atraver sa bann tel lekipman nou vwar poudir parfwa bann, nou apel sa bann *gust of wind*, ki kapab sorti ant 24, mont ziska 80kilomet a ler Mr Speaker ki fer li difisil parfwa.

E mon krwar avyon parey *Emirates*, parfwa baze lo zot standar zot fer de *attempt* pour

zot kapab apoze, si zot pa kapab zot bezwen retournen. So i annan sa nesesite pour lavenir pour nou pouse pour nou kapab ganny en nouvo erport.

Mr Speaker atraver sa lazans osi mon'n ganny fer konpran ki i annan sa nesesite osi pour sa bann proze desarz lakaz, nou apel *STP* ganny realize dan lavenir akoz sa osi avek sanzman klima, lenpak lentansite delo lo later i pour fer ki nou pour kapab ganny bann problemn polisyon mazer otour nou lakot.

E parey nou konnen, nou premye pilye lekonomi se *tourism* e sa dan li menm li parey problemn polisyon mazer otour nou lakot e parey nou konnen, nou premye pilye lekonomi se *tourism*. E sa dan li menm li, si Sesel dan lavenir pa pouse pour kapab realiz sa bann tel proze Mr Speaker nou pou kapab vwar nou dan problemn.

E letan parey *COVID* ti fer, letan touris pa kapab vin Sesel, sa i pou annan en gro lenpak lo nou pei, letan i konsern lanplwa e kree larises.

Trwazyenm demann ki mon anvi met devan Mr Speaker, i vre ki nou'n lev nivo, Danm La Gogue Mr Speaker, me sa i tanporer. I en mezir tanporer. E Gouvernman i

bezwen pouse ki sa Danm Grand Anse Mahé i ganny realize akòz dapre Mr Amelie e bann lenformasyon ki nou gannnen, i posib dan lavenir nou pou annan bann gran laseres ki annan pou fer avek sanzman klima.

E i pour annan bann moman nou pou ganny en ta lapli dan en kourt letan. Me si nou'n annan bann kapasite stokaz Mr Speaker i pour ed nou avek nou bann lenfrastruktir, devlopman dan plizyer sèkter parey bann sèkter enportan *tourism*, lapes avek lagrikiltir.

So mon pe met sa trwa konsèrn devan, ki mon santi ki ozordi avek devlopman, resaman sa lannen dan COP27 lannen pase, mon annan en Mosyon Mr Speaker ki pe vini lo sa *loss and damage*. Sa i en keksoz ki Sesel pour bezwen sivre e pouse ki fer sir ki bann pei devlope zot kapab kontribye pour met larzan ki bann *Oceanic nation* parey nou, parmi sa bann Lalyans *Oceanic Nation* nou kapab fer bann *claim*, e ganny larzan pour nou kapab met bann enfrastruktir ki pour *build* nou rezilyans, an menm tan fer nou vin pli soutenab.

E de lot kote en lot keksoz ki nou bezwen sivre Mr

Speaker, resaman osi dan bann *meeting* Nasyon-z-Ini i annan en pa enportan ki *Tuvalu* en lot *Oceanic nation* in met en *claim* devan Nasyon-z-Ini.

E Nasyon-z-Ini in met devan bann pei devlope ki sa zafer *climate justice* i en size ki zot bezwen komans regarde e zot in met li parmi bann dimoun, konseye legal pour sey vwar dan lavenir ki fason bann *large Oceanic nation* zot kapab fer bann *claim*.

Mr Speaker se bann pa ki pozitiv ki mon vwar poudir lazistis pour bezwen vini. So se bann lenformasyon ki enportan, ki nou konnen koman en Manm Lasanble, an menm tan piblik deor la pour nou sivre, pour fer sir ki letan sa bann keksoz pe pran plas, Sesel osi i antre pour li *claim back* sa ki i merite Mr Speaker.

Avek sa de pti mo ankor enn fwa mon le remerci tou bann Manm ki'n kontribye lo sa Mosyon. I en Mosyon ki dan lentere nasyonal. I pa en Mosyon partizan e mon demann zot pour donn zot sipor. Mersi.

### **MR DEPUTY SPEAKER**

Mersi Onorab William. Donk nou pour pran en vot lo Mosyon prezante par Onorab William ki lir koumsa:-

Prenan kont sityasyon sanzman klima e son lefe domaz globalman, Lasanble i demann Gouvernman pou fer tou sa ki neserer pou ekip Lazans Meteoloji avek lekipman neserer pou resevwar lenformasyon pou previzyon *early warning* pli presi.

Mon a demann tou Manm ki an faver pour endike silvouple? Mersi. Okenn Manm ki kont? Mersi Madanm Clerk. Donk lo Mosyon ki mon'n fek lir an antye, enn pti pe letan avan, i annan 24 Manm ki'n vot an faver, napa Manm ki kont e napa Manm ki'n *abstain*. Setadir nou fini lo en vot inanim Lasanble Nasyonal.

**(APPLAUSE)**

**MR DEPUTY SPEAKER**

Sa i byen, aköz sanzman klima i konsern nou tou. E alor sa ti parey mon ti'n dir pli boner, nou'n ganny en lendikasyon ki prosen Mosyon ki ti lo *Order Paper* Onorab William pe retire. Ki fer ki nou sesyon travay pour ozordi, i fini. E nou konnen poudir nou pe pran *recess*.

Setadir Lasanble pa pour zwenn formelman isi anndan Mardi avek Merkrede prosen. Nou pour rebran travay le 16 Me. Madanm Clerk i korek sa le 16 Me?

Me zis pour lenformasyon piblik aköz nou pe al *recess*. Mon konnen i annan serten komanter ki'n ganny fer aköz nou ti komans nou sesyon travay sa lannen en pe tar - pa nou ki'n anvi antre tar aköz ti annan en travay ki ti pe ganny fer la anndan pour sanz konfigirasyon fason ki nou ti asize.

Be kantmenm sa nou'n le mentenir nou kalandriye *recess*, aköz malgre nou pa pe asiz isi anndan i annan en kantite travay ki fer *behind the scene* e ki piblik i bezwen konpran.

I annan bann komite ki kontinyelman pe zwenn pour fer bann lesanz avek bann diferan antite. I annan konsiltasyon, mon konnen i annan bann diferan *MDAs* in demann bann *Caucus* pou anvoy bann reprezantan par egzanp pour revwar zot bann Polisi, ki nou bann Manm pour partisip ladan.

I annan vizit ki bann Manm i fer dan zot *constituency* ouswa rankontre piblik, sa i ganny fer tou le semenn. I osi annan preparasyon pour 30tyenm Laniverser Lasanble Nasyonal ki Sekretarya avek bann Manm pe enplike avek sa.

Donk nou pe e al dan lakour pour nou al dormi, nou

kontinyen travay parey bann travayer ki nou'n koz lo la bomaten. Donk mon swete ki zot konpran, nou bann *constituents* dan lakour poudir sa ki nou pe fer, e alor nou ava zwenn le 16 Me. Donk mersi pour zot kontribisyon nou ava rezwenn laprosenn fwa.

**(ADJOURNMENT)**